

రోమియుల్క రెగిడ్లి ఉత్త్రమ్. బారిక్ జలో పవులు రోమ్ పట్టుమ్చ సంగుమ్చక రెగిడ్లి ఉత్త్రమ్

మొదొల్ కోడు

¹ రోమ్ పట్టుమ్తెచ దేముడు ప్రేమ కెర్ల జోచి సుద్ది జా జోచయ్ జంక మెన, జో నిసాన బుకార్ల మాన్సుల్క, యేసుక్రీస్తుక * గొత్తి సుదొ జలో పవులు రెగిడ్లి ఉత్త్రమ్. దేముడు దిలి సుబుమ్ కబుర్ నూనయ్తి రిసా ఆవ్ జోచొ బారికి జంక మెన, యేసుక్రీస్తు అంక నిసాన బుకారా అస్సె. ఈంజయి కామ్ అంక సొర్పు దా అస్సె.

² ఈంజ సుబుమ్ కబుర్ తెద్రవుక మెన అగ్గెయి తెంతొ జోచ కబుర్లు సంగిలనచి అత్తి, జో రెగ్డయ్లి జో దిలి దేముడుచి కొణొతె ప్రమానుమ్ సంగ తిలన్.

³ సుబుమ్ కబుర్ మెలె, జో దేముడుచొ ఎక్కి పుత్తున్చి రిసాచి కబుర్. జో పుత్తున్క 'మాన్సు' మెన దెకిలె, అమ్ యూదుల్చొ దావీదు పూర్గుమ్చొచి సెకుమ్తె జెర్మిలన్.

⁴ అమ్చొ ప్రబు జలో యేసుక్రీస్తు, జో మొర గెచ్చు అన్నె జీవ్ జా ఉట్టిన్ రిసా దేముడుచి పూత్తు మెన దేముడుచి సుద్ది తిలి ఆత్మచి ఒగ్గర్ సెక్తి తెన్ రుజు కెరన్లన్.

⁵ జలె, ఎత్తి దేసిమి జోక నంపజా జోచి కోడు నిదానుమ్ కెర జోచి నావ్ గవురుమ్ కెర్తు మెన మాన్సుల్క సుబుమ్ కబుర్ నూనయ్త జోచొ బారికుల్ అమ్ జంక మెన, జో ప్రబు జోచి దయ అమ్క దా అస్సె.

⁶ యేసుక్రీస్తుచ సొంత మాన్సుల్ తూమ్ కి జంక మెన, జేవ్ తెన్ బెదుక మెన వేర వేర దేసిమ్లుతె తుమ్క కి దేముడు బుకారా అస్సె.

* 1:1 1:1 నెంజలె 'గొత్తి జలో రిత్తో', నెంజలె 'సేవ కెర్తొసా'.

7 అమక అబ్బో జలొ దేముడుచి ప్రబు జలొ యేసుక్రీస్తుచి దయ సేంతుమ్ తుమ్చి ఉప్పిరి తవున్!

రోమియుల్క దెకుక మెన పవులుచి ఆస

8 తొలితో కిచ్చొ మెలె, తుమ్ ఎత్తిజిన్చి రిసొ †యేసుక్రీస్తుచి నావ్ దెర అంచొ దేముడుక అంచి సర్ల ఆవ్ సంగితసి. ప్రబుచి ఉప్పిరి తుమ్ రోమియుల్ తుమ్చి నముకుమ్ తిలిన్చి రిసొ ఒండి లోకుమ్చ మాన్సులొ సూన అస్తి.

9 జోచొ పుత్తున్చి రిసొచి నుబుమ్ కబుర్ సూనవ సూనవ ఆవ్ సేవ కెర్తొ దేముడు అంచి రిసొ సాచి జతయ్. ఆవ్ ప్రార్దన కెర్తి పొది, కెయక తెయక నే పిట్టె తుమ్చి రిసొ జోక ఆవ్ సంగితసి.

10 తుమ్చి రిసొ ఆవ్ ప్రార్దన కెర్తిన్తె ఏక్ కిచ్చొ మెలె, జోచి దయ తిలె, కీసి గే తుమ్తె ఆవ్ అప్పె జెంక వాట్ దెవున్ మెనయ్ ఆవ్ ప్రార్దన కెర్తసి.

11 తుమ్చి ఆత్మక డిట్టుమ్ కెర్తి రితి తుమ్క కిచ్చొ జవున్ ఆత్మసెక్తి దొర్కు కెర్తి రితి కిచ్చొ జవున్ కామ్క జెతిసి కెరుక మెన, తుమ్క దెకుక తుమ్తె గెచ్చుక అంక ఒగ్గర్ ఆస.

12 తుమ్చి ఆత్మక డిట్టుమ్ కెరుక మెన సంగిలె, తూమ్ కి ఆవ్ కి, ఎక్కిలోక ఎక్కిలో నముకుమ్ దెకిలె అన్నె సర్ల దయిరిమ్ జమ్దె.

13 ఒ బావుడ్లు, తుమ్ కిచ్చొ జానుక అంచి ఇస్టుమ్ మెలె, యూదుల్ నెంజిల అన్నె ఒగ్గర్జిన్తె ఆవ్ కీసి గెచ్చ ప్రబు దిలి పంటొ జోవయింతె లాయ అస్సి గే, తుమ్తె గెచ్చ, తుమ్తె కి దస్సి పంటొ లాయిక మెన ఆవ్ ఒగ్గర్ సుట్లు ఉచర అస్సి, గని అప్పెక అంక వాటు అడ్డు తా అస్సి.

† 1:8 1:8 మెలె, యేసుక్రీస్తు జోవయింక నంపజలనచి పాపుమ్ వయ గెచ్చయ్లి రిసొ 'జోయ్యి మదెనె జతికయ్ ఎత్తి అదికారుమ్ తిలొ దేముడు అబ్బొసి అమ్చ ప్రార్దనల్ సూనె' మెనయ్, జయ దయిరిమ్క యేసుక్రీస్తుచి నావ్ దెర పవులు దేముడుక ప్రార్దన కెర్తయ్, ఆవ్ కి జోవయింక ప్రార్దన కెరుక జతయ్.

14 †గ్రీసు దేసిమ్చక కి, గ్రీసు దేసిమ్చ నెంజిలసక కి, ఒగ్గర్ సదు కెర్లసక కి, సదు నేన్ల మాన్సుల్క కి ఆవ్ సుబుమ్ కబుర్ సూనవుక మెన, ప్రబు అంక హూచి తియార అస్సె.

15 జాకయ్, తుమ్ రోమ్ పట్టుమ్చక కి సుబుమ్ కబుర్ బోదన కెరుక మెన అంక ఒగ్గర్ ఇస్టుమ్ అస్సె.

నముకుమ్ వాట్కయ్ రచ్చన దొర్కు జతయ్

16 సుబుమ్ కబుర్చి రిసా అంక కిచ్చొ లాజ్ నాయ్. సుబుమ్ కబుర్చి ఉప్పిరి అంక పూర్తి దయిరిమ్. కీనంపజతో ఎత్తి మాన్సు పాపుమ్ తెంతో రచ్చించుప కెర్తి రిసా దేముడుచి సెక్తి సుబుమ్ కబుర్ తెయి అస్సె. జా రచ్చన క్రీస్తుక నంపజతన ఎత్తిజిన్క, *తొలితో యూదుల్క, వడ్డొ యూదుల్ నెంజిలసక.

17 దేముడుచి పున్నిమ్ సుబుమ్ కబుర్ తెయి డీస్తయ్, దొర్కు జతయ్†. జో దెతి జా పున్నిమ్, జా రచ్చన, అమ్క కీసి దొర్కు జతయ్ మెలె, †పూర్తి నముకుమ్ వాటు. దేముడుచి కొడొతె జో సొంత రెగ్గయ్లి రితి, “ప్రబుచి ఉప్పిర్చి నముకుమ్క కో పున్నిమ్కీ జవుల గే జెవ్వి జివుల”.

దేముడుచి పున్నిమ్ నెసీలసచి రిసాచి తీర్పు

18 దేముడుక విరోదుమ్ జా మాన్సుల్క పాపుమ్ కెర కెర జోవయించి పెట్టిచి పాపుమ్తె సత్తిమ్క లుంకడ్డొ, దస్సి ఎత్తి.

‡ **1:14 1:14** గ్రీసు దేసిమ్చ మాన్సుల్క మెనుక జతయ్, గని పవులు ఈంజ ఉత్తుమ్ రెగ్గె పొదులె, యూదుల్ నెంజిల ఎత్తిజిన్క కి ‘గ్రీసు దేసిమ్చక’ మెనుక ఏక్ అలవాట్ తిలి.

§ **1:16 1:16** మెలె, క్రీస్తుకయ్ నంపజతో ఎత్తి మాన్సు. యోహాను 1:12, 3:16, 18, 36.

* **1:16 1:16** తొలితో యూదుల్క అవ్కాసుమ్ తంక చి వడ్డొకయ్ యూదుల్ నెంజిలసక అవ్కాసుమ్ తంక మెన ఎత్తి అదికారుమ్ తిలో దేముడుచి సెలవ్. లూకా 24:47, బారికుల్ 1:8, 13:46. † **1:17 1:17** జోచి సత్తిమ్ పున్నిమ్ జోవయింక నంపజలసక దొర్కు కెరనీతికయ్ అమ్క అన్నె బెదవంతయ్. ‡ **1:17 1:17** నెంజిలె ‘చి జా సత్తిమ్ పున్నిమ్ అమ్క దొర్కు జలె, అన్నె నముకుమ్ పలొయ్తయ్’. § **1:17 1:17** నెంజిలె “ప్రబు దెతి పున్నిమ్ జలన జోవయించి ఉప్పిర్చి నముకుమ్కయ్ ఇండుక” హాబక్కుకు 2:4 దెక.

మాన్యుచి ఉప్పిర్ జోచి కోపుమ్ జో దేముడు పరలోకుమ్ తెంతో నువ దా దెకయెదె, లయడెదె మెన రుజ్జు * డీస అస్సె.

19 దేముడుక జేవ్ విరోదుమ్ జలిసిచి అన్నె మాన్యుల్క జేవ్ కెర్ల పాపల్క 'జోవయించి పాపుమ్' మెన కిసి సంగుక జయెదె మెలె, జో దేముడుచి రిసా జేవ్ జానుక జతిసి ఎత్కి జోవయించి పెట్టి జాన్తి. కిసి మెలె, జోయ్యి సొంత జోవయింక దెకవ అస్సె.

20 కిసి మెలె, జో నే డీస్తాసా కిసా అస్సె గే, మెలె జోవయింక 'కెయెక తెయెక తా గెతి సెక్తి అదికారుమ్ జోకయ్ అస్సె. జోయ్యి దేముడు' మెలి రుజ్జు లోకుమ్ జెర్తయ్లి తెంతో, జో తెయార్ కెర్లిస్ ఎత్కితె సొస్టుమ్ డీస్తయ్, చి తెదొడి తెంతో మాన్యుల్ పూర్తి చిన అస్తి. జాకయ్, ప్రబుచి మొక్కె "నేనుమ్" మెనుక నెతిరి.

21 దస్సి, జోవయింక 'జోయ్యి దేముడు' మెన జేవ్ జాన్లె కి ఒప్పన్తి నాయ్, జోక గవురుమ్ దెకితి నాయ్, జో దిలిన్క 'తుయి దిలది' మెన ఒప్పన్తి నాయ్, జోక నర్ద సంగితి నాయ్, గని వెర్రి బుద్ది జల, చి బుద్ది నెంజిల జోవయించ పెట్టి అందర్ జా గెల.

22 'జాన్ల మాన్యుల్ ఆమ్' మెననయి జేవ్ బుద్ది నెంజిలన జా గెల.

23 అస్సె, నే మొర్తొ కెయెక తెయెక జివ్ తతో దేముడుక ముల దా, మాములుమ్ మొర్త మాన్యుల్చి రూపుమ్చ, పిట్టల్ రూపుమ్చ, జంతువుల్ రూపుమ్చ, అయివో రూపుమ్చ బొమ్మల్క ఇస్టుమ్ జా, దసచకయ్ జొకరుక దెర్ల.

24 జాకయ్ దేముడు జోవయింక కిచ్చొ సిచ్చ దిలన్ మెలె, "జోవయించి పెట్టిచ ఆసల్ రితి ఇండ లంజె కమొతె పూర్తి గెచ్చ, ఎక్కిలోక ఎక్కిలో జోవయించ ఆగ్గక నిస్కారుమ్ కెరన, జోవయింక జెవ్వి మరియాద కడన్తి సిచ్చ సేడ్డు, కతు" మెనయ్, దస్సితెయ్ జో

* **1:18 1:18** సిలువతె యేసు మాన్యుచి పాపుమ్ వయ గెచ్చయ్లిన్తె నయ్తానుక మొర్తుక జీన పాడ్ కెర అస్సె; ఎత్రియిల్ 2:14. నయ్తానుక జీన పాడ్ కెర్లిస్ తెన్ నయ్తాను చి సేవ కెర్లిసి ఎత్కిచి ఉప్పిరి కి యేసు జీన పాడ్ కెర అస్సె.

జోవయింక సొర్ప కెర దిలన్.

25 దేముడుచి రిసాచి సత్తిమ్ గ్యానుమ్ జేవ్ నెస కెర అబద్దుమ్క ఇస్టుమ్ జల, చి జో ఎత్తి జెర్మయ్లోసిచి సేవ కెరుక ముల కెర, జో తెయార్ కెర్లిన్కయ్ జొకరుక దెర, దనచచి సేవ కెర్తతి. గని జెర్మయ్లోసొకయ్ కెయఱకి జెయ్యి! ఆమేన్.

26 జలె, 'జెర్మయ్లోసొక ముల కెర తయార్ జలిన్కయ్ జేవ్ కోర్ప జలి రిసాయి, జోవయించి ఆఱ్గిచి పాపుమ్చ ఆసల్క దెర్ను సేడయ్ తత్తు' మెన, దసితె జో దేముడు సొర్ప కెర దిలన్. దస్సి, మాములుమ్ తెర్నిమున్ను జతిన్ ముల దా, జోవయించ తేర్బోదల్ తెన్ లంజె జంక దెర్.

27 జోవయించ మున్నుబోదల్ కి దస్సి, తెర్ని తెన్ చెంగిల్ జితిసి ముల దా, ఎక్కిలోక ఎక్కిలో పూర్తి వెర్రి ఆస జా, ఎక్కిలో తెన్ ఎక్కిలో లంజె వెట్కారుమ్ జా, జోవయించ ఆఱ్గితె ఆత్మల్తె జోవయించి జా పాపుమ్ కెలచి, పాడ్ జల.

28 అన్నె, దేముడుక 'అస్సె. జొయ్యి దేముడు' మెన జేవ్ ఒప్పనుక నెస కెర జొక పచ్చిల్ రిసా, కామ్క నెంజిలి బుద్ధితె, పొరపాట్ ఇండితిన్తె జోవయింక జో సొర్ప కెర దిలన్.

29 జోవయించి పెట్టి కిచ్చొ బెర్లి మెలె, ఎత్తి రగల్ పాపుమ్బుద్ది, పాపుమ్ కమె, అన్నె మాన్సుల్చి ఆస్తిక ఆస జితిసి. కుస్సిదుమ్ కి బెర్లి. జోవయించి పెట్టి బెర్తు గోసల్, అత్యల్ కెర్తి బుద్ది, కొడొ జుజవ జట్టి జితిసి, మోసిమ్ కెర్తిసి, కుస్సిదుమ్ ఉచర్తిసి, దన బుద్దుల్ జల. జేవ్ అన్నె కిన్చక జల మెలె, సొండెల్ జలన,

30 మాన్సుల్క ఆరిచ నిందల్ సంగ, జోవయించి నావ్ పాడ్ కెర్తన, పరలోకుమ్చొ దేముడుక విరోదుమ్ కెర్తన, అన్నె మాన్సుల్క నిస్కారుమ్ కెర్తన, గవురుమ్ ఉచరంతన, 'అన్నె కిచ్చొ కిచ్చొ గర్ప కమె కెరుమ' మెన ఉచర్త కుట్రల్ కెర్తన, అయ్యెన్అబ్బొన్చి కోడు నే నూన్తన జల.

31 జేవ్ బుద్ధి నెంజిలన, జేవ్ ఒప్పున్లి కామ్ నే కెర్తన, ప్రేమ నేన్లన, కన్యారుమ్ నేన్లన.

32 “దన కమొ కెర్తన, మొర్తి సిచ్చక విలువ జతతి” మొన దేముడు తీర్పు కెర అస్సె మొన జేవ్ జాన్లె కి, దన కమొ ఇండితతి. చి దన కమొ అన్వె మాన్సుల్ ఇండిలె, మొన్సితతి, ‘చెంగిల్’ మొంతతి.

2

దేముడుచి పున్నిమ్చి తీర్పు

1 జాకయ్, ఓ మాన్సు కొన్సొ జలెకి, తుమ్ ఎక్కిలోక ఎక్కిలో ‘గర్బ’ మొన తీర్పు సంగిలె, తుమ్చ సొంత పాపల్చి రిసొ తుమ్క కి జా తీర్పు లయితయ్. మెలె, అన్నెక్కోక ‘గర్బొ’ మొన తీర్పు సంగిలె, తుమ్క తుమి పాపుమ్ వయడ్తను. తూమ్ తీర్పు సంగిలో మాన్సు కొన్సొ జలెకి, జో కెర్త తప్పుల్తె తూమ్ కి ఇండితను.

2 ఆవ్ అగ్గె రెగిడ్లి జాబిత తప్పు కమొ కో కెరుల గే, దేముడు జోవయింక తీర్పు కెర, సిచ్చ కెరుక ఒప్పున అస్సె మొన జానుమ్. అన్వె, జో సత్తిమ్చొ జతయ్చి రిసొ జో కెర్తి తీర్పు సరిగచి మొన జానుమ్.

3 ఓ మాన్సు కో జలెకి, దన కమొ కెర్తనక జోవయించి పాపుమ్చి తీర్పు తుమ్ సంగిలె, తూమ్ కి దన కమొ కెర్లె, దేముడు దెతి సిచ్చ తుమ్కయ్ పిట్టెదె మొన ఏక్ వేల ఉచరంతను గే?

4 నెంజిలె, ‘ఆమ్ కిచ్చొ కెర్లె కి జోచి ఎదివాల్ దయ అమ్చి ఉప్పిరి అస్సె, చి ఓర్పుప జా అమ్క చెమించుప కెరెదె’ మొన తుమ్క తూమ్ ఉచరంతను గే? తుమ్క ‘జోవయించ పాపల్ ఒప్పున ముల్తు’ మొనయ్ జో దేముడు జోచి దయ దెకయ్తయ్ మొన నేన్సు గే?

5 తుమ్చి రాడ్ జీవుక తుమ్చ పాపల్ ములుక నెన కెర, జో దేముడు దెతి సిచ్చ తుమ్క తుమి ఆనన్తను. జా సిచ్చ కెయ్చ లయెదె మెలె, ఎత్తిజిన్క తీర్పు కెర సిచ్చ గే, బవుమానుమ్ గే దెతి జోచి సత్తిమ్క రుజ్జు దెకయ్తి వెల్లి దీసికయ్.

6 జోవయించి జీవితముక కేన్ మాన్యు కీస కమొ కెర్తె తవుల గే, జయ్యి దీసిక దసచక సరిజతిసి తీర్పుల్ జో జర్గు కెరెదె.

7 జా దీసి నే జతె అగ్గెచి మదెనె సగుమ్జన్ పరలోకుమ్చి ఉజిడతె బెదితి, ప్రబు గవురుమ్ జతిన్తె బెదితి ఆస జా, జో దెతి సత్తిమ్క నిదానుమ్ ఇండుల. “జేవ్ పరలోకుమ్తె అంచి తెన్ కెయ్క తెయ్క జతి జీవ్, జో దెయెదె.

8 గని సగుమ్జన్ జోవయించి ఇస్టుమ్ అయ్లి రితి ఇండుక ఆస జా, సత్తిమ్ ఇండితిసి ముల కెర, పాపుమ్ ఇండితతి. జోవయించి ఉప్పిరి, జో దేముడుచి కోపుమ్ తయెదె, చి జో దెతి సిచ్చ కచితుమ్ జోవయింక లయెదె.

9 దేముడు జా సిచ్చ జర్గు కెర్తె, ముక్కిమ్క తొలితొ యూదుల్తె, పడ్డో గ్రీసు దేసిమ్చతె కి, పాపుమ్ ఇండితో ఎత్కి మాన్యుక బాదల్ దుకుమ్ పిట్టె నాయ్,

10 తొలితొ యూదుల్తె, పడ్డో గ్రీసు దేసిమ్చ మాన్యుల్తె కి, సత్తిమ్ ఇండితో ఎత్కి మాన్యుక ‘బవుమానుమ్’ మెన దేముడు జోవయింక జోచి పరలోకుమ్చి ఉజిడతె బెదవ గవురుమ్ దా, సేతుమ్ దెయెదె.”

11 దేముడు తేడల్ దెకె నాయ్.

12 అమ్ యూదుల్క జో దిల ఆగ్గుల్ నేన్తె యూదుల్ నెంజిలసతె కో పాపుమ్ కెర తవుల గే, జేవ్ ఆగ్గుల్ నెంతె తీర్పు జా నాసెనుమ్తె గెచ్చుల, అన్నె, అమ్ యూదుల్ జేవ్ ఆగ్గుల్ జానుమ్. జేవ్ ఆగ్గుల్ జాన్ల అమ్ యూదుల్తె కో పాపుమ్ కెర తవుల గే, ఆగ్గుల్చి తెడి అస్తిచి జేవ్ ఆగ్గుల్ జోవయించి ఉప్పిరి సాచి జవుల, చి జోవయించి పాపుమ్చి సిచ్చ జేవ్ వయుల.

13 మోసేచి అత్తి దేముడు దిల ఆగ్గుల్ ఎక్కి సూన్తసయ్ నాయ్, గని జేవ్ ఆగ్గుల్తె బెదితి బుద్ధి ఇండితసయి కో జలె, జోవయింకయ్ దేముడు జోవయించి పాపుమ్ నే వయడ్తె జోవయించి దయకయ్ ‘జోవయింక దొర్కు జలి పున్నిమ్ అస్సె’ మెన దెకెదె. దెక జోవయించి

* 2:9 2:9 ‘గ్రీసు దేసిమ్చ’ మెన ఇన్నె సంగిలె, యూదుల్ నెంజిలసక సంగితయ్.

సిచ్చు పిట్టయెదె.

14 పడ్డొ, యూదుల్ నెంజిలన, మోసే తెన్ దేముడు దిలి ఆగ్గుల్ నెంతె తిలె కి, ఒత్తవ ఆగ్గుల్ జేవ్ నేన తిలె కి, నేన జాన్ల రిత జా జేవ్ ఆగ్గుల్ తెన్ బెదితి బుద్ది జేవ్ ఇండిలె, జేవ్ ఆగ్గుల్ జేవ్ కెయ నే నూనై కి నదు నే కెర్లె కి, జేవ్ ఆగ్గుల్ జోవయించి పెట్టి కామ్ కెర్తి రితి జతయ్.

15 దొర్కు, జలి ఇండడి దెకయ్త ఆగ్గుల్ దేముడు కిసి మోసే తెన్ దిలి ఆగ్గుల్తె రెడ్లవ అస్సె గే, 'దస్సి ఇండుతు' మెన జేవ్ మాన్సుల్చి పెట్టి జో రెడ్ల అస్సె మెన రుజ్జు జతయ్, అన్నె, 'సత్తిమ్' మెన జేవ్ సత్తిమ్ చినితిన్తె, 'పాపుమ్' మెన జేవ్ పాపుమ్ చినితిన్తె కి రుజ్జు జతయ్. అన్నె, జోవయింక జెవ్వి పరిచ్చు కెరన నిందల్ వయడస్సి రితి, నెంజిలె చెమించుప కెరస్సి రితి, జోవయించ సొంత కమొ 'చెంగిల్' గే 'గార్' గే జెవ్వి చినన ఒప్పునుల.

16 అమ్ నూనయ్లి సుబుమ్ కబుర్తె కిచ్చొ ఏక్ బెదితయ్ మెలె, జేవ్ ఇసి తీర్పు కెరంతిసి కెయడ పూర్తి జర్గు జయెదె మెలె, క్రీస్తు జలో యేసుచి అత్తి దేముడు మాన్సుల్చి పెట్టిచ గుట్టుల్ తిలిసి ఎత్తి తీర్పు కెర్తి జా వెల్లి దీసికయ్, తెదొడ్కయ్ పూర్తి రుజ్జు జయెదె.

యూదుల్క మోసే తెన్ దేముడు దిలి ఆగ్గుల్

17 గని ఒత్తవ తుమ్ యూదుల్, 'యూదుల్ ఆము' మెనన, 'ఆగ్గుల్ రితి దేముడు అమ్కయ్ దా అస్సెచి రచ్చన జమ్దె' మెన ఆగ్గుల్కయ్ నంప కెర్లెను జలె, 'అమ్ యూదులి దేముడు తెన్ బెద అన్నుమ్' మెన గవురుమ్ ఉచరంతను జలె,

18 మోసే తెన్ దేముడు దిలి ఆగ్గుల్తె తిలిసి ఎత్తి వెల్లెల మాన్సుల్ తుమ్క సికడ అస్తిచి రిసొ, దేముడుచి ఇస్టుమ్ కిచ్చొ కిచ్చొ జతయ్ గే తుమ్ జాన్సు. జలె, చెంగిల్ తిలిన్తె గార్ తిలిసి నిన చెంగిల్చి మెస్సితను జలె,

19 పడ్డొ 'గుడ్డి జలసక వాట్ దెకయ్తన ఆము' మెన, 'అందర్బుద్దితె తిలసక ఉజిడి దెకయ్తన ఆము' మెన,

20 'బుద్ధి నెంజిలసక సికడ్తన ఆము' మెన, 'బాలబోదల్క సికడ్తనా జలమ్ ఆము' మెన, 'గ్యానుమ్ ఎత్తి సత్తిమ్ ఎత్తి మోసే తెన్ దేముడు దిలి ఆగ్గుల్తె అమ్తెయి, అమ్చ ఆగ్గుల్తెయి అస్సెచి దేముడు జా పూచి ఎత్తి అమ్కయ్ తియార అస్సె' మెన తుమ్ నిజుమి ఉచరై,

21 వేర మాన్సుల్క తుమ్ సికడ్తన తుమ్కయ్ తూమ్ కిచ్చొక సికడ్తన్సు నాయ్! 'చోరుక నాయ్' మెన తుమ్ బోదన కెరై కి, చోర్పు నాయ్ గే?

22 'లంజెకమొ కెర నాయ్' మెన సంగిలే కి లంజెకమొ కెర్రసు గే? 'బొమ్మల్క జొకరుక నాయ్, వెట్కారుమ్!' మెన ఒప్పన్లై కి, గుడివొతెచ బొమ్మల్ తుమ్ చోర దెర గెతసు గే? తుమ్ ఉచర.

23 'దేముడు మోసేచి అత్తి అమ్ యూదుల్కయ్ జోచ ఆగ్గుల్ దా అస్సె' మెన తుమ్ గపురుమ్ ఉచరన్లైకి, ఆగ్గుల్క నిదానుమ్ నే కెరై దేముడుచి మరియాద కడ ఇండితసు గే?

24 తుమ్ అమ్చ యూదుల్ కి దస పాపల్ కెర్రసు. దేముడుచి కొడెతె పూర్గుమ్ తెంతో రెగిడ్లి రితి, †"తుమ్ యూదుల్చ కమొచి రిసా, యూదుల్ నెంజిల మాన్సుల్ దేముడుచి నావ్ దూసుప కెర్రతి".

25 దేముడు దిల ఆగ్గుల్ రితి పూర్తి తప్పు నెంతె ఇండిలెకయ్ తుమ్ యూదుల్ జోచయ్ మాన్సుల్ జతి గుర్తుచి సున్నతిక విలువ తయెదె. గని జో దిల ఆగ్గుల్ ఇండితిసి తుమ్ పిట్టవన్లై, జోచయ్ మాన్సుల్ జతి గుర్తు దెకయ్తి జా సున్నతి తుమ్ కెరన తిలె కి, నే కెరన్లై రితి జయెదె.

26 జలె, జోచి అగి జా సున్నతి నే కెరన్లై మాన్సు కో జలెకు దేముడుచ ఆగ్గుల్ తెన్ బెదితి బుద్ధి ఇండ ఆగ్గుల్తె సంగిలి దొర్కు జలి సత్తిమ్ నెరవెర్పుప కెరై రితి జలె, జో జా సున్నతి నే కెరన్లైకి, ఆత్మకయ్ జో జా సున్నతి కెరన్లై రితి జా అస్సె మెన జో దేముడు దెకె నాయ్ గే? దెకెదె.

27 దస్సి జలె, యూదుల్ నెంజిల మాన్సుల్ జోవయించి అగి జా సున్నతి నే కెరన్లైకి, జోవయింతె సగుమ్జిన్ దేముడుచ ఆగ్గుల్ తెన్

† 2:24 2:24 యెసయా పుస్తకుమ్ 52:5, యెహెజ్కేలు 36:22.

బెదితి బుద్ధి ఇండితతి. అన్నె, తుమ్ యూదుల్క మోసే తెన్ జోచ ఆగ్గుల్ దా తిలె కి, తుమ్చితె సగుమ్జిన్ ఆగ్గుల్చి కోడు నే కెర్తె పిట్టయ్తను. జలె, లోకుమ్చ ఎత్కిజిన్క ప్రబు పరిచ్చ కెర్తి వెల్లి దీసి అయ్లె, ఈంజ మదెనె ప్రబుచి బుద్ధి ఇండిల జేవ్ యూదుల్ నెంజిలస తుమ్క నేరిమ్ వయడ్త సాచుల్ జవుల. మెలె, జోవయింక తుమ్క ప్రబు తీర్పు కెర్తె, తుమి తీర్పు సేడ పాపుమ్ వయితె.

28 మెలె, యూదుడు జెర్మ ఎక్కి ఆగి కెరన్లి గుర్తు తిలోసాక 'నిజుమ్చో యూదుడు' మెనుక నెంజె. పడ్తో ముక్కిమ్క కలుసుప జలి సున్నతి అగి కెరంతిసి నెంజె.

29 దస్సి జలె “కో నిజుమ్చ యూదుల్ జవుల?” మెన పుసితె, ఆత్మకయ్ సుద్ది జలో ఎత్కి మాన్సు. సత్తిమ్ దెతి సున్నతి కిచ్చొ మెలె, రెగ్డయ్లి ఆగ్గుల్చి రిసా ఆగి కెరంతిసి నెంజె, గని మాన్సుచి పెట్టి దేముడుచి సుద్ది తిలి ఆత్మ జర్గు కెర్తిసి. జోవయించి ఆత్మతె కో సుద్ది జా జోచయ్ మాన్సుల్ జా తవుల గే, జెవ్వి నిజుమ్చ యూదుల్ జవుల. జోచయ్ జల మాన్సుల్క కిచ్చొ ముక్కిమ్ మెలె, మాన్సుల్ దెతి గవురుమ్ నాయ్, గని దేముడు దెతి గవురుమ్.

3

దేముడుచి సత్తిమ్ గెచ్చె నాయ్

1 జలె, వేర మాన్సుల్క చి కంట అమ్ యూదుల్క కిచ్చొ జిన్లి వరుమ్ అస్సె గే? నెంజిలె, అమ్ యూదుల్ జలి చినన్తి సున్నతి కెరంతిన్తె కిచ్చొ లాబుమ్, కిచ్చొ విలువ అస్సె గే?

2 అమ్ యూదుల్క లాబుమి, దేముడు తొలి సంగిల ప్రమానల్ దేముడుచ కొణొ అమ్ యూదుల్చి అత్తి జో సొర్పు కెర దా అస్సె, జాక అమ్ చెంగిల్ దెకుక మెన, ఒత్త తిలిన్క అమ్ సాచి నూనవుక మెన.

3 దస్సి జలె, అమ్ యూదుల్తె సగుమ్జిన్ నముకుమ్ నెంజిలె కిచ్చొ జయెదె? జేవ్ నముకుమ్ నెంజిలిన్చి రిసా జోవయించొ అమ్చో దేముడుక 'నిదానుమ్చో నెంజె' మెనుక జయెదె గే?

4 ఎత్తి మాన్సు అబద్ధుమ్ జలెకి, దేముడు సత్తిమ్ తయెదె. దేముడుచి కొడెతె పూర్ణుమ్ జోవయించి రిసా జోయ్యి రెగ్గయలి రితి; *“తుచ కొడె నెరవెర్పువ జతిన్తె తుచి సత్తిమ్ రుజ్జు జయెదె, చి మాన్సుల్ తుక పరిచ్చ కెరై తుయి జిన్తె”.

5 గని అమ్ యూదుల్చి పాపుమ్చి రిసా అమ్ వెట్కారుమ్ నిస్కారుమ్ జా అస్సుమ్. జో దేముడుచి సత్తిమ్, మాత్తుమ్, జోక గవురుమ్ ఆన్తయ్. జలె, అమ్చి పాపుమ్క దెకిలె, జోచి సత్తిమ్క దెకిలె, జా తేడ డిస్తిన్తె జోకయ్ గవురుమ్ జెతయ్ జలె, అమ్ కిచ్చొ ఉచరుక? ‘అమ్ పాపుమ్ కెర్తిన్ చి జో సత్తిమ్ కెర్తిన్చి తేడ దెకిలె జోచి గవురుమ్ డిస్తయ్చి రిసా అమ్చి పాపుమ్తె జోకయ్ లాబుమ్’ మెన, జవున్, ‘అమ్చి పాపుమ్చి రిసా జో అమ్క సిచ్చ కెరుక బెదె నాయ్’ మెన అమ్ ఉచరుక గే? మాన్సుల్చి పాపుమ్ బుద్దికయ్ మాన్సు ఇసి ఉచరుక జయెదె.

6 దస్సి ఉచరుక నాయ్. ‘ఒండి లోకుమ్చ మాన్సుల్క ఆకర్క పరిచ్చ కెర తీర్పు కెర సిచ్చల్ దెయిందె, బవుమానల్ దెయిందె’ మెన జో ఒప్పున అస్సె. జలె, అమ్ యూదుల్చి పాపుమ్క ‘కిచ్చొ నెంజె’ మెలి రితి జో దెకితో జలె, ఒండి లోకుమ్చ మాన్సుల్క కో కిసి సత్తిమ్చి తీర్పు కెరుక జయెదె! బెదె నాయ్.

7 ‘దస్సి మెను నాయ్’ మెంతె. ‘అంచి అబద్ధుమ్చి రిసా దేముడుచి సత్తిమ్ సొస్టుమ్ డీస జోచి గవురుమ్ దెకయ్తయ్ జలె, అంచి పాపుమ్చి సిచ్చ ఆవ్ కిచ్చొక వయుక?’ మెంతె, ఓ మాన్సు.

8 ‘చెంగిల్చి జర్గు జవున్ మెనయ్ పాపుమ్ కెరుమ’ మెంతె సగుమ్జిన్. అమ్క “జేవ్ కి దస్సి సంగితతి” మెన, అమ్చి మరియాద కడన్తి రితి సగుమ్ జిని అమ్క నింద సంగితతి మెన తుమ్ జాన్సు. జలె, జేవ్ దస్సి సంగితస జోవయించి జా పాపుమ్చి సిచ్చ కి కతి రితి దేముడు లయడెదె. జోచి తీర్పు సరిగా అస్సె.

లోకుమ్ ఎత్తిచ మాన్సుల్ పాపుమ్ కెర్లస

* 3:4 3:4 కిర్లసలు 51:4

9 జలె, కిచ్చొ ఉచరుక జయెదె? వేర మాన్సుల్చి కంట అమ్ యూదుల్క దేముడుచి సిచ్చ పిట్టయ్తినీ కిచ్చొ జలెకు తయెదె గే? నాయ్, గెద! ఆవ్ జేవ్చి కంట గొప్ప సుదల్ గే, నెంజుమ్ గెద, ఆవ్ ఉప్పిరి రుజ్జు రెగ్గ దెకయ్లి రితి, ఎత్తి మాన్సు. యూదుల్ జలెకి, గ్రిసు దేసిమ్చ జలెకి, కో జలెకి, పాపుమ్క దెర్ను సేడ పాపుమ్ సుదల్ జా అస్సుమ్

10 దేముడుచి కొడెతె పూర్గుమ్ రెగ్గవ తిలి రితి,
†“సత్తిమ్చొ మాన్సు కేనె కి నాయ్. ఎక్కిలో కి నాయ్.

11 కోయి బుద్ది తతోసొ నాయ్,

జీవ్ తిలో దేముడుక చ్చజితోసొ కోయి నాయ్.

12 ఎత్తి మాన్సు సత్తిమ్ ముల, కామ్క నెంజితిన్తె సేడ గెచ్చ అస్తి.

కోయి సత్తిమ్ కెర్తి నాయ్, ఎక్కిలో కి నాయ్.”

13 †“జోవయించి డొంగొ ఉగిడ్ల మెస్సున్, జోవయించ కొడె గని.

మోసిమ్ కెర్తి రిసొయి జీబు చోడి బులయ్ తతి.

అయివొచి విస్సుమ్ జోవయించ ఒట్టోతెయి అస్సె.”

14 †“జోవయించి చోడి బెర్తు సాపెనల్ మూర్కుమ్ విస్సుమ్ అస్సె.

15 *జోవయించ చట్టో లోయి దెకుక మెన బే బేగి నిగుల.

16 నాసెనమ్ కస్టుమ్ జోవయించి ఇండితి వట్టె అస్సె.

17 సెంతుమ్ వాట్ ఇండుక ఎధరె నేన్తి.

18 †దేముడుక ఎదిలి కి బితి నాయ్.”

19 మోసె తెన్ దేముడు దిలి ఆగ్గుల్తె కిచ్చొ కోడు తిలె కి, కక్క సంగితయ్ మెలె, జా ఆగ్గుల్చి రితి తెడిచ మాన్సుల్కయ్. కిచ్చొక మెలె, జోవయింతె కోయి దేముడుక జబాబ్ దెంక నెతిర్తి రితి ఎత్తి చోడి ముద్దో జంక, చి యూదుల్ కి నే పిట్టె, ఒండి లోకుమ్చ ఎత్తి మాన్సు దేముడుచి సిచ్చక జలిలెక జవుల, దేముడుచి పరిచ్చ జోవయించి తీర్పు జంక.

† 3:10 3:10 10-12 కీర్తనలు 14:2, 3 చి 53:3. † 3:13 3:13 కీర్తనలు 5:10, చి

139:4. † 3:14 3:14 కీర్తనలు 10:7. * 3:15 3:15 15-17: యెసయా 59:7-8.

† 3:18 3:18 కీర్తనలు 36:2.

20 మెలె, దేముడు మోసే తెన్ దిలి ఆగ్నల్చి రితి ఇండితి వాటు దేముడుచి మొక్కె ఈంజ లోకుమ్చో కేన్ మాన్సుచి పాపుమ్ పుంచె నాయ్, చి ఆగ్నల్ రితి మాన్సుల్క తీర్పు కెరై, జో కక్కయ్ 'పున్నిమ్చో' మెనుక బెదె నాయ్. ఆగ్నల్ అమ్చి పాపుమ్ పుంచితి నాయ్. అమ్చి పాపుమ్ దెకయ్తతి. జేవ్ ఆగ్నల్తె తిలిన్చి రిసా అమ్చి పాపుమ్ చినితసుమ్.

యేసుక్రీస్తుక నంపజలె పున్నిమ్

21 ఆగ్నల్తె నాయ్. గని వేరతెయ్ దేముడు జోవయించి పున్నిమ్ మాన్సుల్క దొర్కు కెర అస్సె. జాకయ్ †మోసే పూర్ముమ్చోచి అత్తి దేముడు రెగ్గయ్ల ఆగ్నల్, అన్నె పూర్ముల్చి అత్తి సంగిల దేముడుచ కబుర్లు కి అగ్గె తెంతో జా రుజ్జు డీస్తయ్. జలె, జా పున్నిమ్ ఆగ్నల్ రితి నాయ్, గని వేరతెయ్ దొర్కు జలిసి అప్పెయి మాన్సుల్క జానయ్ జా అస్సె.

22 జా పున్నిమ్ యేసుక్రీస్తుచి ఉప్పిరి కో జోచి నముకుమ్ తివుల గే, జేవ్ ఎత్తి జిన్కయ్ 'పున్నిమ్' మెలి రితి దేముడు దెకెదె, జేవ్ కొన్స జలెకి జోచి పున్నిమ్తె జోవయింక వాట దెయెదె.

మాన్సుల్తె జో తేడల్ దెకె నాయ్.

23 మెలె, కో కి పాపుమ్ కెర దేముడు దెకయ్లి సత్తిమ్ ఇండుక నెత్త కెర, జోచి మొక్కె ఓడువ జా అస్సి.

24 జాకయ్, జో కిచ్చో వాటు మాన్సుల్చి పాపుమ్ పుంచ అస్సె మెలె, జోచి దయకయ్ ఆరి అమ్క నీతిసుదల్ కెర అస్సె. కిసి మెలె, క్రీస్తు జలో యేసు అమ్చి పాపుమ్ వయిలిన్క జో దేముడు అమ్క సయ్తాన్చి రాజిమ్ తెంతో నెతోవ గెల అస్సె.

25 అమ్ కెర్ల పాపల్క అమ్ జెతికయ్ సిచ్చ పిట్టయ్తి బలి జో జంక జోచి లోయి నూవుక మెన దేముడు అబ్బొసి జోవయింక టీవడ్డన్.

† 3:21 3:21 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రగ్గయ్లి ఆగ్నల్ మెన అమ్ జానుమ్. ఈంజ కొడో ఎత్తి బైబిల్తె అగేచి పాచ్ పున్తకుమ్తె రెగ్గయ్ జా అస్సె. ఈంజ దెకవుక మెన కుపియ బాసతె నొయి ప్రమానుమ్తె మోసే పూర్ముమ్చోచి అత్తి రెగ్గి దేముడుచ ఆగ్నల్ మెన రగ్గవ అస్సె.

జా రచ్చన వరుమ్ అమ్ మాన్సుల్క కి, క్రీస్తుచి ఉప్పిరి అమ్ అమ్చి నముకుమ్ తింక. జో అబ్బొసి జా బలి దిలిసి ఏక్ రుజ్జు దెకయ్తయ్. పాపుమ్క 'పాపుమీ. జా పాపుమ్ గెలెకయ్ మాన్సుల్క అంచి తెన్ అన్నె బెదవనుక జయెదె' మెన జో సత్తిమ్చి తీర్పు కెర్లిన్చి రుజ్జు దెకయ్తయ్. కిచ్చొక మెలె, జోచి పరలోకుమ్చి కన్కారుమ్ బుద్దిక అమ్చ అగ్గెచ పాపల్ సిచ్చు కెరుక వాయిద కెర తిలన్.

26 జో సత్తిమ్చ తీర్పుల్ కెర్తొసా జలిన్చి జా రుజ్జు ఈంజయి కాలుమ్క దెకవుక మెనయ్ వాయిద కెర్లన్. అన్నె కిచ్చొక మెలె, 'కో యేసుకయ్ నంపజవుల గే, జోవయించి పాపుమ్ వుంచి జయెదె, జోవయింకయ్ పున్నిమ్ దెకిన్దె' మెనయ్ రుజ్జు దెకయ్తి రిసాయి వాయిద కెర్లన్.

27 జాకయ్, 'అమ్ యూదుల్కయ్ దేముడు మోసే తెన్ దిలి ఆగ్గుల్తె పున్నిమ్' మెన అమ్ కిసి గవురుమ్ ఆననుక జయెదె! నెంజె. కిచ్చొచి రిసా, దేముడు మోసే తెన్ దిలి ఆగ్గుల్చి రితి అమ్ మాన్సుల్ కెర్లకమొ కామ్క నెంజిలిన్చి రిసా నాయ్, కామ్క అయ్లి రిసా నాయ్, గని నముకుమ్ వాటు అమ్క రచ్చన దొర్కు జతయ్.

28 నిజుమి, కిచ్చొ ఒప్పున్తసుమ్ మెలె, కేన్ ఆగ్గుల్ రితి ఇండితిన్తె పున్నిమ్ నాయ్, జా నేన్లిన్చి రిసాయి కో నాసెనుమ్తె గెతి నాయ్, గని, ప్రబుచి ఉప్పిరి నముకుమ్ తిలెకయ్ మాన్సుచి పాపుమ్ వుంచి జయెదె, చి దేముడు జో మాన్సుక పున్నిమ్ మెలి రితి దెకిదె మెన ఒప్పున్తసుమ్. జా రచ్చన రితి నముకుమ్ వాటు దొర్కు జతిసి.

29 నెంజిలె, దేముడు ఎక్కి యూదుల్కయ్ దేముడు జయెదె మెంతె గే? యూదుల్ నెంజిలసక కి జో దేముడు జయె నాయ్ గే? నిజుమి, యూదుల్ నెంజిలసక కి జోయ్యి దేముడు.

30 కిచ్చొక మెలె, ఎత్కిక జో దేముడు, జో ఎక్కిలో. ఎక్కిలోతె ఏక్ రగుమ్ అన్నెక్తోతె అన్నెక్ రగుమ్ జతోసా నెంజెచి రిసా వేర వేర రచ్చన కెరె నాయ్, గని యూదుల్ జతి గుర్తుచి సున్నతి కెరల్లసక క్రీస్తుక నంపజా గెలె, జేవ్ నంపజలి రిసాయి జోవయించి పాపుమ్

జో వుంచెదె చి జోవయింక 'పున్నిమ్' మెలి రితి దెకెదె. అన్నె, జా సున్నతి నే కెరన్లన జోవయింక నంపజా గెలె, జోవయించి నముకుమ్చి రిసాయి జోవయించి పాపుమ్ కి, జో వుంచ జోక కి 'పున్నిమ్' మెలి రితి దెకెదె.

³¹ దస్సి జలె, ఎక్కి జోచి ఉప్పిర్చి అమ్చి నముకుమ్చి రిసాయి అమ్క 'పున్నిమ్ జల' మెలి రితి జో దెకెదె మెలె, జో దిల ఆగ్గుల్ అమ్ వెంట గెలుక గే? నెంజె. అమ్చి నముకుమ్చి రిసాయి జో దిల ఆగ్గుల్ తెన్ బెదితి సత్తిమ్ అమ్ ఇండుకయ్. దస్సి, జేవ్ ఆగ్గుల్తె తిలిసి నెరవెర్పువ కెరుమ్దే.

4

నముకుమ్ వాట్, దేముడుచి దయ వాటు రచ్చన

¹ జలె, అమ్ యూదుల్చొ పూర్లుమ్చొ అబ్రాహామ్చి రిసా కిచ్చొ మెనుమ? ఆగ్ రగుమ్చి అమ్చి జెర్మున్చి రిసా ఉచర్లె, అమ్ యూదుల్చి సెకుమ్క జో అబ్బొ జయెదె.

² జలె, ఏక్ వేల జోచ కమొచి రిసాయి అబ్రాహామ్క పున్నిమ్ కలుగు జతి జలె, జో అబ్రాహామ్ గవురుమ్ ఉచరనుక జతి, గని జోవయించ కమొచి రిసాయి జోవయింక పున్నిమ్ మెన మాన్పుల్ ఉచర్లె కి, దేముడు దస్సి దెకె నాయ్.

³ * "అబ్రాహామ్ దేముడు సంగిలి కోడు నంప కెర్లి రిసాయి 'జోక పున్నిమ్' మెలి రితి జో ప్రబు దెకిలో"

మెన దేముడుచ కొణెతె రెగ్గ అస్సి.

⁴ జలె, కో జలెకు కామ్ కెర్లె 'కామ్ కెర్లొ' మెన దెతి కూలి దానుమ్ నెంజె, జా, చి అబ్రాహామ్ "నంప కెర్లి రిసాయి 'జోక పున్నిమ్' మెలి రితి ప్రబు దెకిలో" మెన దేముడుచి కోడు తెన్ రెగ్గవ అస్సి.

⁵ దస్సి, అబ్రాహామ్ తెన్ కీసి జర్లు జలి గే, అన్నె మాన్పుల్ తెన్ కి దస్సి జయెదె. మెలె, కిచ్చొ కామ్క జెతికయ్ కామ్ జేవ్ నే

* 4:3 4:3 ఆదికాండుమ్ 15:6.

కెరె కి, కిచ్చొ కామ్ కి కామ్క నెంజిలె కి, పాపుమ్ కెర్లనక జోచి దయకయ్, జోవయించి పాపుమ్ పుంచితో దేముడుకయ్ కో నంప కెరె, జోవయించి నముకుమ్చి రిసాయి 'అంచి పున్నిమ్ జోవయింక దా అస్సి' మెలి రితి జో పాపుమ్ పుంచితో దేముడు దెకెదె.

⁶ దస్సి, "జోవయించ కమొచి రిసా నాయ్, గని జోచి దయచి రిసా దేముడు కక్క కక్క 'జోవయింక పున్నిమ్' మెలి రితి దెకెదె గే, జోవయింకయ్ చెంగిలి" మెన దావీదు పూర్ణమ్చొ ఏక్ కోడు రెగ్గ అస్సి.

⁷ "కిచ్చొ తప్పుల్ చెమించుప జా అస్తి గే,

కచ పాపల్ పుంచి జా అస్తి గే,

జోవయింకయ్ చెంగిలి

⁸ కేన్ మాస్సుచి పాపుమ్ ప్రబు జోవయింక వయడె నాయ్ గే,

జోకయ్ చెంగిలి"

మెన రెగ్గ అస్సి.

⁹ జలె, ఈంజ చెంగిల్ వరుమ్ కక్క దొర్కు జతయ్? ఎక్కి యూదుల్ జతి గుర్తుచి సున్నతి కెరన్లనకయ్ దొర్కు జతయ్ గే జా సున్నతి నే కెరన్లనక కి దొర్కు జతయ్ గే? అబ్రాహామ్ నంపజలిన్కయ్ 'జోక పున్నిమ్' మెలి రితి ప్రబు జోచి దయక దెకిలన్ మెంతసుమ్.

¹⁰ జలె, ప్రబు జోక 'జోవయింక పున్నిమ్' మెలి రితి దెకిలిసి కెయ్ తెంతో? జా సున్నతి జో నే కెరంతె అగ్గె తెంతో గేర కెరన్ల పడ్డె గే? పడ్డె తెంతో నాయ్. అగ్గెయ్ తెంతో.

¹¹ జా సున్నతి నే కెరంతె అగ్గె తెంతో జో నంపజలిన్చి రుజ్జు దెకయ్తి గుర్తుకయ్ పడ్డె జో జా సున్నతి కెరన్లొ. దస్సి, జా సున్నతి నే కెరంతె కో నంపజా ప్రబు ఆరి దెతి పున్నిమ్ జా తవుల గే, జోవయింకయ్ అబ్రాహామ్ అబ్బొసి జయెదె. దస్సికయ్, జా సున్నతి నే కెరంతె అగ్గె కి ప్రబు 'జోవయింక పున్నిమ్' మెలి రితి అబ్రాహామ్క దెకిలొ.

¹² అన్నె, దస్సి కి, కో జా సున్నతి కెరన తిలె కి, జా సున్నతి నే కెరంతె అగ్గె తెంతో దేముడుచి కోడు నంప కెర్లొ అబ్రాహామ్చి రితి జవుల గే,

మెలె, జోచి రితి నంపజవుల గే, జోవయింకయ్ కి అబ్రాహామ్ అబ్బొసి జయెదె.

13 దస్సి, “ఈంజ లోకుమ్ ఏలుప కెర్తి వాట తుమ్క దొర్కు కెరిందె” మెన అబ్రాహామ్క చి ‘జోచి సెకుమ్తె పడ్డొ జెర్ముక తిలసక’ మెలి కోడు, దేముడు సంగిలి ప్రమానుమ్ కేన్ వాట్ అయ్లి మెలె, ఆగ్గుల్ రితి వాట్ నాయ్, గని జో దేముడుచి కోడు జో నంపయ్ కెర్లన్చి రిసా ‘జోవయింక పున్నిమ్’ మెలి రితి జో దెకిలన్.

14 ఏక్ వేల దేముడు మోసే తెన్ దిలి ఆగ్గుల్ రితి కెర్తస, జేవ్ జా ఆగ్గుల్ రితి కెర్లి రిసాయి అబ్రాహామ్చ పుత్తర్లు జా ఏలుప కెరుక తత్తి జలె, దేముడు సంగిలి ప్రమానుమ్ కామ్క నెంజిలి, జా ప్రమానుమ్చి ఉప్పిర్చి నముకుమ్ కామ్క నెంజిలి.

15 అమ్ ఆగ్గుల్ తిలసచి ఉప్పిర్చి తీర్పు కిచ్చొ మెలె, ‘పున్నిమ్ జా అస్తి’ మెన కచి రిసా ఆగ్గుల్ సాచి జతి నాయ్. ఆగ్గుల్ తిలె, అమ్చ కమొక ‘పాపుమ్చయ్’ మెన రుజ్జు దెకవయ్ అమ్చి పాపుమ్చి రిసాచి సిచ్చ అన్తతి. అన్నెక్ కిచ్చొ మెలె, ఆగ్గుల్ నెంజిలిన్తె, ఆగ్గుల్ నేన్లసతె కో పాపుమ్ కెర అస్తి గే, నెంజిలె ఏక్ వేల పున్నిమ్ కెరుక జతి జలె ‘పున్నిమ్ కెర అస్తి’ గే ఆగ్గుల్ వాట్ రుజ్జు కెరుక నెంజె.

16 జేవ్ దొన్ని అల్లర్చి రిసా మాన్సుచి రచ్చునక దేముడు కిచ్చొ దిలొ మెలె, జొయ్యి ఆదారుమ్ కెర్లిసి కిచ్చొ మెలె, కమొ నెంజె, గని రితి నముకుమ్ తెన్. కిచ్చొక మెలె, కమొ నాయ్, గని నముకుమ్ ఆదారుమ్ జలె, జా ప్రమానుమ్ జెయిమ్ జతిన్క దేముడుచి దయయ్ సాలు, అన్నె, జా ప్రమానుమ్ జోచి దయచి రిసా జెయిమ్ జయెదె జలె, అబ్రాహామ్చ పుత్తర్లు జలస ఎత్కిజిన్కయ్ జా ప్రమానుమ్ జెయిమ్ జయెదె. అబ్రాహామ్చ పుత్తర్లు యూదులి, అమ్చి దేముడు మోసే తెన్ దిలి ఆగ్గుల్ అమ్చ తిలసయ్ గని అన్నె కోయి నాయ్ మెన నాయ్, పడ్డొ ‘అమ్ యూదుల్ ఎత్కిజిని’

మెన నాయ్. గని అబ్రాహామ్‌చి రితి దేముడుచి †కోడు నంప కెర్తన ఎత్తిజిని, జేవ్ యూదుల్ జలెకి నెంజిలె కి జోచ పుత్తర్లు జవుల. జోచి రితి నముకుమ్ తిల ఎత్తిజిన్‌క జో అబ్రాహామ్ అబ్బొ జయెదె.

17 దేముడుచ కొడతె రెగ్గయ్‌లి రితి,

‡“ఒగ్గర్ దేసిమ్‌లుచ సెకుమ్‌లుచ మాన్సుల్‌క తూయి అబ్బొసి జతి రితి ఆవ్ నంగ అస్సి.”

మెన అబ్రాహామ్‌క జో సంగిలన్. దస్సి, మొర్లసక జియడ్డె, అగ్గె నెంజిలిన్‌క తిలిసి రిత బుకార్తో దేముడుక అబ్రాహామ్ నంప కెర్లె, దేముడుచి మొక్కె అమ్ జో దేముడుచి కోడు నంప కెర్తన ఎత్తిజిన్‌క అబ్రాహామ్ అబ్బొ జా అస్సె.

18 ఒగ్గర్ దేసిమ్‌లుచ సెకుమ్‌లుచక జో అబ్బొ జతిసి జెయిమ్ జతిసి జో అబ్రాహామ్‌క రుజ్జు నే డిసిలెకి, జో జా ఆన్ తెన్ తిలన్, అన్సె,

*“అగాసుమ్‌చ సుక్కల్ కిసి ఎత్తివాట్ అస్సి గే, దస్సి తుమ్‌చి సెకుమ్‌తె వడ్డె జెర్మితస ఎత్తివాట్‌జిన్ జవుల”
మెన జో దేముడు ప్రమానుమ్ సంగిలిసి జో నంప కెర్లన్.

19 ఆగెకు జో మంత్రో జా పుంజెక్ వెర్సుల్ జా తా మొర్తి వయసు జా తిలె కి, తేర్ని జలి సారా గొడ్డు జా తిలె కి, జో అన్మానుమ్ జయె నాయ్.

20 కేన్ సుట్టు జా ప్రమానుమ్‌చి ఉప్పిరి అన్మానుమ్ జయె నాయ్, గని దేముడుక ‘జా జెయిమ్ కెరెదె’ మెన నముకుమ్ తా జోక గవురుమ్ దెతె తిలన్, చి జోచి నముకుమ్ అన్సె డిట్టుమ్ జలి.

21 ‘జో సంగిలి రితి దేముడు కెరుక తెరె’ మెన పూర్తి నముకుమ్ తెన్ తిలొ.

‡ 4:16 4:16 ‘అబ్రాహామ్‌క ఎత్తి అదికారుమ్ తిలొ దేముడు సంగిలి కోడు’ మెలె, జోవయిచి సెకుమ్‌తె వడ్డె జెర్మితస వడ్డెక ఏలుప కెర్లెన్‌చి రిసాచి కోడు. జేవ్ వడ్డె ఏలుప కెర్లెన్‌క యేసుక్రీస్తు ముక్కిమ్‌చొ జయెదె, చి జోవయింతెన్ ఏలుప కెరుల. వడ్డె జో ఎత్తి అదికారుమ్ తిలొ దేముడుచ కొడె ఎత్తి నంప కెరుక ముక్కిమ్, గని ముక్కిమ్‌క ‘జోవయిచి కోడు’ మెలె, యేసుయి; యోహాను 1:1-2, 14; చి యేసుచి రిసాచి సుబుమ్ కబుర్, జోవయిచి రిసా దేముడు మోసి తెన్ దిలి ఆగ్గుల్ సంగిలిసి ఎత్తి. § 4:17 4:17

అదికాండుమ్ 17:5. * 4:18 4:18 అదికాండుమ్ 15:5.

22 జాకాయ్, 'జోచి నముకుమ్, జోక పున్నిమ్ జలి రితి జతయ్' మెన దేముడు తీర్పు కెర్లె.

23 గని 'జోచి నముకుమ్, జోక పున్నిమ్ జలి రితి జతయ్' మెలి కోడు ఎక్కి జోచి రిసా నాయ్,

24 గని అమ్చి రిసా కి. అమ్చొ ప్రబు జలో యేసుక అన్నె జియణ్ణో దేముడు అబ్బొన్చి ప్రమానుమ్ అమ్ నంప కెర్లె, అన్నె మాన్సుల్క కి 'జోచి నముకుమ్ జోక పున్నిమ్ మెలి రితి జతయ్' మెంతి తీర్పు జోచి దయక్ కెరెదె.

25 అమ్చయ్ పాపల్ వయితి రిసా ప్రబు జలో యేసు అమ్క జెతి సిచ్చు సేడ్లన్. జా సిచ్చు అమ్క లయితిసి పిట్టవుక మెన. అన్నె, అమ్చి పాపుమ్ దస్సి †పుంచి జలిసి రుజ్జు జవున్ మెనయ్ దేముడు అబ్బొసి జోక అన్నె జియణ్ణన్.

5

యేసుక్రీస్తుచి అత్తి అమ్క సేంతుమ్ జలిసి

1 జలె, నముకుమ్ వాట్ అమ్చి పాపుమ్ పుంచి జా అస్సె. అమ్చొ ప్రబు జలో యేసు అమ్చి పాపుమ్ పుంచిలి బలి జలి రిసా దేముడు తెన్ అమ్క సేంతుమ్ జలి.

2 దేముడుచి దయచి రిసా నముకుమ్ తెన్, జో అమ్క రచ్చన దొర్కు కెర అస్సె. ఈంజ రచ్చన అమ్క కేన్ వాట్ దొర్కు జా అస్సె మెలె, జో యేసుప్రబు అమ్చి పాపుమ్ పుంచితి బలి జలి వాటు, అన్నె జా రచ్చన అమ్క దొర్కు జలి తెంతొ, దేముడుచి పరలోకుమ్చి ఉజిడ్తె అమ్ బెదుమ్దె మెలి ఆస అమ్క దొర్కు జా అస్సె, చి అమ్క ఒగ్గర్ సర్దసంతోసుమ్ జతసుమ్.

3 అన్నె కిచ్చొ మెలె, సుబుమ్ కబుర్ నూనయ్తి ప్రబు అమ్క దిలి కామ్చి రిసా, అమ్ బాదల్ సేడ్డిన్చి రిసా కి అమ్క సర్దసంతోసుమ్. బాదల్ సేడ్డె ఓర్పుప జా, నిదానుమ్ సికుక జయెదె.

† 4:25 4:25 చి ఒత్త తెంతొ అమ్క జో 'పున్నిమ్' మెలి రితి దెకిలిసి.

4 జేమ్ బాదల్ సేడ్డిసి అమ్క ఏక్ పరిచ్చ కెర్లి రితి జయెదె, చి అమ్ ఓర్పువ జా నిదానుమ్ సికిలె అమ్క “పరిచ్చతె జీన్ల” మెన దేముడు జోచి సర్ల దెకవ అమ్చి పెట్టి అమ్క అన్నె ఆస దెయెదె, అమ్క అన్నె దిట్టుమ్ కెరెదె, చి

5 జా ఆసచి రిసా అమ్ నంపజలిసి జెయిమ్ జయెదె, లాజు జము నాయ్. దేముడు అమ్క దిలి దేముడుచి సుద్ది తిలి ఆత్మ తెన్ జోచి ప్రేమ అమ్చి పెట్టి సువ బెరవయ్ దా అస్సె. జయి అమ్క రుజ్జు.

6 అమ్క కిచ్చొ సెక్తి నెంజలి పొది, ‘చెంగిల్ సమయుమ్’ మెన అమ్ పాపుమ్ సుదల్క సయ్తాన్చి రాజిమ్ తెంతొ రచ్చించుప కెర్లి రిసాయి క్రిస్తు మొర అమ్చి రిసాచి అర్పితుమ్ జలన్.

7 జలె, పున్నిమ్ డీస్తా కేన్ జవున్ మాన్సుక కిచ్చొ జవున్ బాద తెంతొ రచ్చించుప కెరుక మెన కో మాన్సుల్ సొంత జివు దెవుల గే? దెతి నాయ్. కేన్ గే ఏక్ సుట్టు కో జవున్ చెంగిలో మాన్సుక రచ్చించుప కెరుక మెన కో జలెకు మాన్సు దయిరిమ్ జా మొరెదె.

8 గని, దేముడుచి ప్రేమ అమ్క కిసి రుజ్జు జతయ్ మెలె, అమ్ పాపుమ్ కెర్లస జా తతికయ్, అమ్క రచ్చించుప కెర్లి రిసా క్రిస్తు జోచి జివు దిలన్.

9 జలె, దొర్కు జలి అర్పితుమ్ జో దిలిన్చి లోయిచి రిసా అమ్చి పాపుమ్ అప్పె పుంచి జా అస్సెచి రిసా, అన్సె, దేముడు అమ్క దెంక తిలి సిచ్చ అమ్క నే లయితి రితి, జో యేసుయి పిట్టవ అస్సె. జా సిచ్చ అమ్ సేడుక నాయ్.

10 మెలె, దేముడుక అమ్ విరోదుమ్ సుదల్ జా తిలి పొది, అమ్చి పాపుమ్ గెచ్చయ్తి రిసా జోచొ పుత్తుసి మొర్లిసి, అమ్క జోతె అన్నె బెదవ దిలన్. కెయ మెలె, జోక అమ్ విరోదుమ్ జా తిలి పొది. జలె, అన్సె, అమ్ అప్పె జో తెన్ అన్నె బెదయ్ అస్సుమ్ జలె, జో అన్నె జీవ్ జా, జీవ్ తతిన్చి రిసా నాసెనుమ్తె నే గెతె, పరలోకుమ్తె జోతె గెతి రచ్చన కచితుమ్ జమదె.

11 జో, పడ్డొ అన్నె కిచ్చొ మెలె, అమ్చొ ప్రబు జలో యేసుక్రిస్తు జర్లు కెర్లిన్చి రిసా దేముడు అమ్క అన్నె బెదవన్లి రిసా, జో దేముడుచి

తెడి ఆమ్ అప్పె అస్సుమ్చి రిసా, జోచి ఉప్పిరి అమ్క సర్దసంతోసుమ్ జతసుమ్.

ఆదామ్ తెంతో మొర్ను యేసు తెంతో జీవుమ్

12 ఎక్కిలో మాన్సు, తొలితొచొ మాన్సు జలో ఆదాము, పాపుమ్తె సేడ్లిన్ తెన్ ఒండి లోకుమ్తె పాపుమ్ అయ్లి, అన్నె పాపుమ్చి రిసా మొర్ను అయ్లి. జాకయ్ ఒత్త తెంతో ఎత్తి మాన్సు పాపుమ్ కెర అస్తి, కెర్తతి, చి ఎత్తిజిన్క మొర్ను అయ్లి.

13 దస్సి, కచితుమ్, దేముడు ఆగ్గుల్ రితి నే దిలి అగ్గెయి తెంతో ఈంజ లోకుమ్తె పాపుమ్ అస్సె. 'గని ఆగ్గుల్ రితి నెంజిలిన్తె జా పాపుమ్చి రుజ్జు సరిగా డీసె నాయ్, చి తీర్పు కెర సిచ్చ కెరుక నెంజె'.

14 జలెకి, ఆగ్గుల్ దిలిన్క *మదెనె జలో మోసే నే జెతె అగ్గె కి, తొలితొచొ ఆదాము తెంతో కి మాన్సుల్క మొర్ను ఏలుప కెర్తె తిలన్. †వేర పాపల్ జేవ్ కెర్లె కి, దేముడుచి కోడు పిట్టవన్లొ ఆదాము కెర్లె రగుమ్ పాపుమ్ నే కెర్లనచి ఉప్పిరి కి మొర్నుయి ఏలుప కెర్తె తిలన్. జలెకి, పడ్డె జెంక తిలో యేసుక ‡తొలితొచొ ఆదాము అమ్క టాలి జతయ్. ఆదాము ఏక్ కాలుమ్క మొదొల్చొ, కిపాపుమ్చి మొర్ను ఏలుప కెర్తి కాలుమ్. పడ్డె యేసు అన్నెక్ కాలుమ్క మొదొల్చొ, పాపుమ్ గెచ్చవ పరలోకుమ్చి రాజిమ్ ఏలుప కెర్తి కాలుమ్.

15 పాపుమ్తె సేడ్లిన్క చి రచ్చన దిలిన్క తేడ. మెలె, ఎక్కిలో మాన్సు పాపుమ్ కెర్లిన్చి రిసా ఒగ్గర్జిన్ మొర్లమ్. గని దేముడుచి దయచి రిసా జో అన్నెక్లొ మాన్సు జలో యేసుక్రిస్తు జోచి ప్రేమక ఆరి దిలి రచ్చనచి ఒగ్గర్జిన్క జో దేముడు నెతోవ కెరయ్ అస్సె.

16 అన్నె, జోచి దయక దేముడు దిలి వరుమ్క జర్లు జతిన్క చి జో ఎక్కిలో కెర్లి పాపుమ్క జర్లు జలిన్క ఒగ్గర్ తేడ. జా ఎక్కి పాపుమ్చి

* 5:14 5:14 నిర్ణమకాండుమ్ 19, 20 అద్యయల్. † 5:14 5:14 ఆదాము తెన్ ఎత్తి అదికారుమ్ తిలో దేముడు సొంత లట్టబ ఏక్ కోడు తిన్నగ నంగ తిలన్. తిన్నగ నంగిలి జా ఆడ్ర ఆదాము పిట్టయల్. అదికాండుమ్ 2:15-17 చి 3 అద్యయమ్. ‡ 5:14 5:14 1 కొరిందిల్ 15:22, 45 § 5:14 5:14 అదికాండుమ్ 3 అద్యయమ్.

రిసాచి తీర్పు కిచ్చొ ఆన్ల మెలె, దేముడు దెతి సిచ్చ. గని, పడ్డొ, అమ్ ఎత్తిజిన్ మాన్సుల్ ఒగ్గర్ పాపుమ్ కెర కెర అమ్ కెర్ల పాపల్ ఒగ్గర్ నిల్వ జా గెలి పొది, జో దేముడు జోచి దయక దిలి రచ్చన కిచ్చొ ఆన్ల మెలె, అమ్చి పాపుమ్ పుంచ దిలిసి.

17 దేముడు సంగిలి *కోడు జో ఎక్కిలో పిట్టవ పాపుమ్తె సేడ్లిసి తెంతొ జా పాపుమ్చి సిచ్చ, మెలె మొర్నుయి, ఏలుప కెర్తయ్. జలెకి, అన్నె కిచ్చొ ముక్కిమ్క జర్గు జయెదె మెలె, జో అన్నెక్లో జలో యేసుక్రీస్తుచి అత్తి దేముడుచి దయచి రిసాచి, జో ఆరి దిలి పున్నిమ్ కక్క కక్క దొర్కు జయెదె గే, జితిన్తె, మెలె పరలోకుమ్చి రాజిమ్తె, జేవ్ † ఏలుప కెరుల.

18 దస్సి జలె, ఎక్కిలో పాపుమ్ కెర్లిసి కిసి ఎత్తిజిన్క సిచ్చతె సేడయ్లి గే, దస్సి, జో అన్నెక్లో పున్నిమ్ కెర్లిసి ‡జోక నంపజల ఎత్తిజిన్చి పాపుమ్ పుంచ జోవయింక జియడ్తయ్.

19 మెలె, ఎక్కిలో మాన్సు దేముడు సంగిలి కోడు నే కెర్లిన్చి రిసా ఏఎత్తిజిన్ పాపుమ్ సుదల్ జా గెలమ్. దస్సి, జో అన్నెక్లో, దేముడు అబ్బొన్చి కోడు నూన కెర్లిన్చి రిసా * ఒగ్గర్జిన్క 'జేవ్ పున్నిమ్ జల రిత జా అస్తి' మెన జో దేముడు కచితుమ్ దెకెదె.

20 ఆగ్గుల్ రితి మదెనె అయ్లి, గని కిచ్చొక మెలె, మాన్సుల్ పాపుమ్ ఇండితిన్చి రుజ్జు సొస్టుమ్ డీసున్ మెనయ్ దేముడు జా ఆగ్గుల్ రితి మదెనె దిలన్. గని మాన్సుచి పాపుమ్ దస్సి సొస్టుమ్ రుజ్జు జలెకి, అమ్క కిచ్చొ రుజ్జు అయ్లి మెలె, దేముడుచి దయ జా పాపుమ్చి జా ఆగ్గుల్ రితి జీన అన్నెయ్ కామ్ కెర్లి.

21 మెలె, పాపుమ్ మొర్ను ఆన, జా పాపుమ్ మొర్ను వాట్ కిసి

* 5:17 5:17 14 నంబర్ కోడుచి ఎట్టొచి. 17 నంబర్? కోడు దెక. † 5:17 5:17 తిమోతిక రెగిడ్లి 2 నంబర్ ఉత్తయ్ 2:12. డీనయ్లిసి 5:10, 20:4, 6 చి 22:5. ‡ 5:18 5:18 నెంజిలె 'పాపుమ్ పుంచి జతి అవ్కాసుమ్, జోవయించి రాజిమ్తె జతి అవ్కాసుమ్, ఎత్తిజిన్క దొర్కు కెర్తయ్'. గని దొర్కు కెర్లి కి, జా నజిలెకయ్. కిసి నజుక మెలె, యేసుక్రీస్తుకయ్ నంప కెరుకయ్. యోహాను 3:18, 1:12. § 5:19 5:19 3:10-12, 23 దెక. * 5:19 5:19 18 నంబర్ కోడు దెక.

ఏలుప కెరై తిలి గే, దస్సి, అమ్చొ ప్రబు జలొ యేసుక్రీస్తు మొర అమ్చి పాపుమ్ పుంచ, జోచి పున్నిమ్ అమ్క ఆరి దిలిస్కయ్ జోచి దయ ఏలుప కెర్ను మెనయ్, దేముడుచి దయయ్ జీన అస్సె. అమ్క 'పరలోకుమ్చి రాజిమ్తె బెద పరలోకుమ్చి జీవుక కెయ్క తెయ్క జియ్ ఆకర్కయ్ ఒత్తయ్ గెతు' మెనయ్ జా వరుమ్ దిలన్.

6

నంపజా పాపుమ్ ముల సత్తిమ్ ఇండుక

1 జలె, కిచ్చొ మెనుమ? 'అమ్చి పాపుమ్ దేముడు చెమించుప కెర్లిన్తె జోచి దయ ఒగ్గర్ డీసుక, ఒగ్గర్ అవ్కాసుమ్ దెమ' మెన అమ్ పాపుమ్ ఇండితె తంక గే?

2 దస్సి ఉచరుక నాయ్. పాపుమ్ ముల అమ్చి సొంత ఆత్మక మొర్ల రిత జలమ్ మెలె, పాపుమ్తె కీసి అన్నె ఇండుమ్దె?

3 యేసుక్రీస్తుచి నావ్ తెన్ బాప్తిసుమ్ జల అమ్ ఎత్తిజిని, జలె, జో మొర పాపుమ్ గెచ్చయ్లిన్చి గుర్తు జతి బాప్తిసుమ్ కడల్లిన్తె జో మొర్లిన్ తెన్ బెదిల్ రితి, జా మొర్ల రిత జలమ్ మెన నేన్సు గే?

4 జో యేసుచి ఆగ్ మొర్లిన్తె అమ్ బెద, అమ్చి ఆత్మక మొర జో తెన్ రోయి జలి గుర్తుకయ్ అమ్ బాప్తిసుమ్ నజన్లమ్. దస్సి, అబ్బొన్ జలొ దేముడుచి సెక్తిక క్రీస్తు కీసి మొర్ను తెంతో అన్నె జీవ్ జా ఉట్లన్ గే, దస్సి, అమ్ ఈంజ బత్తుకయ్ నొవర్ జెర్మన్ జోచి ఆత్మక జెర్మన్ జా సత్తిమ్ ఇండుకయ్ మెన, జో దేముడు అమ్క జియడ అస్సె.

5 జలె, జో మొర్లిన్తె ఆత్మక బెద జో తెన్ అంటుప జలి రితి జలమ్ మెలె, జో అన్నె జీవ్ జా ఉట్టి జీవుక కచితుమ్ ఆమ్ కి జిమ్దె, చి మదెనె ఆగ్క అమ్ మొర్లె, ఆకర్క జోచి రితి ఆమ్ కి జీవ్ జా ఉట్టుమ్దె.

6 అమ్చి ఆగుతె ఏలుప కెరై తిలి అగ్గెచి పాపుమ్బుద్ది పూర్తి గెన్ను మెనయ్, పాపుమ్చి సేవ అమ్ అప్పె తెంతో కెరుక నాయ్ మెనయ్,

పాపుమ్ అమ్చి అగ్గెచి ఆత్మ జో తెన్ సిలువతె గలి జా మొర్లి మెన జానుమ్.

7 అమ్చి పాపుమ్చి ఆత్మ మొర తిలె, పాపుమ్ అమ్క ఏలుప కెర్తెన్ తెంతో విడ్డల్ జా అన్సుమ్.

8 గని అన్నె, క్రీస్తు తెన్ మొర్లమ్ మెలె, 'జో తెన్ జిమ్దె' మెన కి అమ్క దయిరిమ్ అస్సె.

9 కిచ్చొక మెలె, క్రీస్తు మొర తా అబ్బొన్ అన్నె జియడ్తోసా జా కెయఱ అన్నె మొరె నాయ్ మెన జానుమ్. అప్పె జోచి ఉప్పిరి మొర్లుక కిచ్చొయ్ అదికారుమ్ నాయ్.

10 జో మొర్లిన్, జలె, మాన్సుల్చి పాపుమ్ గెచ్చయ్తి బలి జలిసి. జా కామ్, జలె, ఎక్కి నుట్టుక పూర్తి జెయిమ్ జలిసి, కేడ్లిసి. గని జో అప్పె జితిసి, జలె, దేముడుచి గవురుమ్ కెయఱ తెయఱ దెకయ్తి రితి జో జితయ్. జో మొర్లిన్ ఎక్కి నుట్టుచి కామ్, జోచొ అబ్బొన్చి గవురుమ్ దెకయ్తిసి కెయఱ తెయఱ చి కామ్, కేడ్లిసి నెంజె.

11 జాకయ్ తూమ్ కి కిసి దెకనుక మెలె, 'అమ్చి పాపుమ్ గెలి. అమ్చి పాపుమ్చి ఆత్మ మొర్లి' మెనయ్, క్రీస్తు జలో యేనుచి జివుకయ్ నొవర్ జియ అన్సుమ్, చి దేముడుచి గవురుమ్ దెకయ్తి రితి అమ్ ఇండితె తంకయ్ మెన అర్దుమ్ కెరన దస్సి ఇండుక.

12 జాకయ్, మొర్త తుమ్చ ఆగ్గెతె పాపుమ్ ఏలుప కెర్పు నాయ్, నెంజిలె తుమ్చి ఆగ్గెచ ఆసల్ జర్గు కెర్తె, పొన.

13 పాపుమ్ కమొ కెర్తె అయ్దల్ జేవ్ జతి రితి, పాపుమ్తె తుమ్చ ఆగ్గెచ వాటల్ తుమ్ బెదవ నాయ్. గని, 'మొర్లు తెంతో జో అమ్క నెతోవ కెర జో తెన్ బెదవన దేముడు అమ్క జియడయ్ అస్సె, అమ్క జివ్వికెర అస్సె' మెనయ్, జోచి అత్తి తుమ్చి ఆత్మ సొర్ప కెర దా, జోచి సత్తిమ్ దెకయ్త కమొచి రిసొచ అయ్దల్ జేవ్ జతి రితి, తుమ్చ ఆగ్గెచ వాటల్ జోచి అత్తి సొర్ప కెర దాన.

14 జోచి అత్తి సొర్ప కెర దిలదు మెలె తుమ్చి ఉప్పిరి పాపుమ్ ఏలుప కెరె నాయ్. కిచ్చొక మెలె, తుమ్ ఆగ్గుల్చి రితి తెడి నాయ్,

గని జో దేముడుచి దయచి తెడి అస్సున్.

15 జలె, 'అప్పె ఆగ్గుల్ రితి తెడి ఆమ్ నాయ్. జోవయించి దయక దేముడు అమ్క చెంగిల్ దెకితయ్, చి అమ్ పాపుమ్ కెర్లె బాద నాయ్' మెంతసు గె? దస్సి ఉచరుక నాయ్.

16 జోచి సేవ కెరుక మెన కచి అత్తి తుమ్క తుమ్ ఒప్పున కెరన తస్తై గే, జోచయ్ గొతిమాన్సుల్ జా అస్సున్ మెన నేన్సు గే? పాపుమ్తె సార్ప కెరనై, పాపుమ్చ గొతిమాన్సుల్ జస్తై, చి మొర్నుతె గెతె. దేముడుచి కోడు కెర్తిన్తె ఒప్పున కెరంతె జలె, జో దెతి పున్నిమ్ జస్తై.

17 దేముడుక జెయ్యి! పాపుమ్చి సేవ కెర పాపుమ్చ గొతిమాన్సుల్ తుమ్ అగ్గె జా తిలదు, గని తుమ్క అప్పె సికడ్డి తుమ్క అప్పె దిలి కోడ్ రితి ఇండుక తుమ్చి పెట్టి కోర్ప జా అస్సున్.

18 అన్నె, పాపుమ్ ఏలువ కెర్తిసి తెంతో దేముడు తుమ్క విడ్డల్ కెర, సత్తిమ్ ఇండితిన్క తుమ్ గొతిమాన్సుల్ జతి రితి కెర అస్సె.

19 మాన్సుల్ రోజుక అర్దల్ సంగితి రితి, టాలికయ్ 'గొతిమాన్సుల్' మెంతసి. కిచ్చొక మెలె, ఆత్మకమొచి రిసొచ కొడొ అర్దుమ్ కెరనుక తుమ్క ఇదిల్ బాద, చి 'అర్దుమ్ కెరంతు' మెనయ్ ఇసి టాలి తెన్ సంగితసి. జా అర్దుమ్ కిచ్చొ మెలె, లంజె వెట్కారుమ్చ కమొతె, పాపుమ్చి ఉప్పిరి పాపుమ్చ కమొతె తుమ్చ ఆగ్గెచ వాటల్ అగ్గె బెదవంతె తిలదు, గని అప్పె తెంతో తుమ్ కిచ్చొ కెరుక మెలె, దేముడు తుమ్క దిలి సుద్ది పూర్తి నెరవెర్పుపయ్ జతి రితి, సత్తిమ్ కమొక ఇండితిన్తెయ్, తుమ్చ ఆగ్గెచ వాటల్ తుమ్ సార్ప కెర దాస.

20 పాపుమ్చి సేవ కెర్త పాపుమ్చ గొతిమాన్సుల్ తుమ్ తిలి పొది సత్తిమ్ ఇండితి ముద్దొతెను నాయ్, 'ఆమ్ సత్తిమ్ ఇండుక నాయ్' మెన ఇస్టుమ్ అయ్లి రితి ఇండితె తిలదు.

21 గని జా పొదిచ తుమ్చ కమొచి రిసొ అప్పె ఉచర్లై తుమ్క లాజు. జేవ్ కమొ తుమ్క కిచ్చొ లాబుమ్ అన్ల? కిచ్చొ పలితుమ్ దెర్ల? లాబుమ్ నాయ్, కిచ్చొ చెంగిల్ పలితుమ్ నాయ్. దస్సు కమొ మాన్సుక కేనె నెతతి మెలె, నాసెనుమ్తె, మొర్నుతెయి.

22 గని, పాపుమ్ ఏలుప కెర్తిన తెంతో విడ్డల్ జా దేముడుచ గొతిమాన్సుల్ తుమ్ జలి తెంతో, అప్పె కిచ్చో పలితుమ్ దెర్తయ్ మెలె, జో దెతి సుద్ది జా, తుమ్ సుద్ది రితి ఇండితను, చి జో దెతి సుద్ది తుమ్క పరలోకుమ్తె బెదయ్తయ్, తుమ్క కెయక తెయక జియడ్డయ్.

23 జలె, పాపుమ్ జేవ్చి సేవ కెర్తసక బట్వాడి మొర్నుయి. గని, దేముడు జోవయించి సర్దక అమ్క ఆరి దిలి వరుమ్, అమ్చొ ప్రబు జలో యేసుక్రీస్తుచి తెడి పరలోకుమ్తె గెచ్చ కెయక తెయక జితిసి.

7

ఆగ్గుల్ తెంతో విడ్డల్ జా క్రీస్తుచి తెడి తిలిన్

1 జలె, దేముడు మోసే తెన్ దిలి ఆగ్గుల్ జాన్ల బావుడ్లు, మాన్సు మొర తిలె నాయ్, గని జివ్వి తిలె పొదికయ్ జోచి ఉప్పిరి ఆగ్గుల్క అదికారుమ్ తయెదె మెన నేన్ను గే?

2 గని, కేన్ జవున్ తేర్బోదచొ మున్నుసి జివ్వి తిలి ఎదిలి, ఆగ్గుల్చి రిసా జోచి తెడి జా తయెదె, జా ఆగ్గు పిట్టవుక నెంజె. గని మున్నున్ మొర గెలె, తెర్నిమున్ను చెంగిల్ తతి జా ఆగ్గు జేవ్చి ఉప్పిరి తయె నాయ్.

3 జాకయ్, మున్నుసి జీవ్ తిలె పొది జా తేర్బోద అన్నెక్లొక గెలె, జాక 'లంజె' మెనుల, గని మున్నుసి మొర గెలె, జా ఆగ్గు ముద్దొ కెర్లిన్ తెంతో జా పిట్టవ జా అస్సె, చి అన్నెక్లొక పెండ్లి జలె లంజె నెంజె.

4 దస్సి, బావుడ్లు, క్రీస్తుక నంప కెర జో తెన్ తుమ్ బెదిలి రిసా, జో యేసుక్రీస్తుచి ఆగ్గే మొర్లిన్ తెన్ తూమ్ కి మొర అస్సున్, చి రిసా తుమ్చి ఉప్పిరి ఆగ్గుల్క అదికారుమ్ నాయ్. దస్సి, తుమ్ అప్పె ఆగ్గుల్చి తెడి నాయ్ చి రిసా తుమ్ అన్నెక్లొచి అదికారుమ్చి తెడి తంక వాట్ తవున్ మెనయ్ దేముడు ఇసి జర్గు కెర్లన్. జో దేముడుచి గవురుమ్ దెకయ్తి రితి అమ్ ఆత్మపలితుమ్ దెరుక మెనయ్, మొర జీవ్ జా ఉట్టో జో క్రీస్తుచి తెడి అమ్ తంకయ్ మెనయ్ ఇసి జర్గు కెర్లన్.

5 ఈంజ అగ్గేచ అమ్చి పాపుమ్చ ఆసల్క అమ్ జితె తిలి పొది అగ్గుల్ అమ్చి పెట్టిచ ఆసల్క 'పాపుమ్చయ్' మెన దెకయ్తె తిల, చి జేవ్ అగ్గుల్ 'దస కమె పోన' మెన సంగితికయ్, జేవ్ పాపల్ కెర్తి ఆస ఒగ్గర్ జా గెలి. పాపుమ్ కెర్తి జా ఆస ఒగ్గర్ జా అమ్చి అగ్గేచ వాటల్తె బార్ జా జేవ్చి కామ్ కెర్తె తా మొర్ను ఆన్తి పలితుమ్ దెర్తె తిలి.

6 గని అప్పె, క్రిస్తు తెన్ బెద అమ్ 'మొర్లి' తెంతో, అగ్గుల్ తెంతో పిట్టవ జా అస్సుమ్. అమ్క దెర బంద తిలి జా అగ్గుల్క అమ్చి ఉప్పిరి అదికారుమ్ నాయ్ చి రిసా రెగిడ్ల అగ్గుల్చి తెడి నాయ్ గని దేముడుచి సుద్ది తిలి ఆత్మకయ్ నొవర్ జెర్మన్ జా, జయ్యి సెక్తికయ్ జోచి సేవ కెర్తసుమ్.

అగ్గుల్తె పాపుమ్ వాట్ చజ ఒగ్గర్ జా గెతిన్

7 జలె, కిచ్చొ మెనుమ? 'అగ్గులీ పాపుమ్' మెనుక జయెదె గే? నెంజె. దస్సి మెనుక జయె నాయ్. గని అగ్గుల్ తత్త నాయ్ జలె, 'ఆవ్' మెనుమ, 'ఆవ్ పాపుమ్ కెర్తెసా' మెన ఆవ్ సరిగా చినంతయ్ నాయ్. "అన్నె మాన్సుల్చి ఆస్తిక ఆస జా నాయ్" మెన అగ్గుల్తె తత్తి నాయ్ జలె, అన్నెక్లొచి ఆస్తిక ఆస జతిన్క 'పాపుమ్' మెన నేన్తయ్, ఆవ్ కి దస్సి పాపుమ్ కెర్తిసి చినంతయ్ నాయ్.

8 గని, పాపుమ్బుద్ది అంచి పెట్టి అగ్గె తెంతో తిలన్, చి "అన్నె మాన్సుల్చి ఆస్తిక ఆస జా నాయ్" మెన అగ్గుల్తె తతికయ్, అంచి పెట్టిచి పాపుమ్ బుద్దికయ్ "దస్సి జలె, అన్నె మాన్సుల్చి ఆస్తిక ఆస జయిందె" మెనయ్ ఆస జలయ్, చి అన్నె ఒగ్గర్ ఆసల్, కిచ్చొ కిచ్చొచ ఆసల్ ఎత్తి జలయ్. అగ్గుల్ నేన్లె, అమ్చి పాపుమ్ నిజిల్ రితి, జివ్ నెంజిల్ రితి తా కామ్ కెరె నాయ్.

9 'ఆవ్' మెనుమ, అగ్గెయి అగ్గుల్చి తెడి నే తస్తె, అంచి పాపుమ్క 'అస్సె' మెన నేన కెర, అంచి ఇస్టుమ్ అయ్లి రితి సర్ల తెన్ జితె తిలయ్, గని జా అగ్గు సూన్లి తెంతో పాపుమ్ అంచి పెట్టి అన్నె జివ్ జలన్, చి ఆవ్ మొర్లయ్.

10 దస్సి, 'జీవ్ దెతి వాట్ దెకయెదె' మెన ఆవ్ నంప కెర్లి ఆగ్గు అంక మొర్తి సిచ్చు ఆన్లన్.

11 కీసి మెలె, పాపుమ్ బుద్ది అంక మోసిమ్ కెర, 'చెంగిల్' మెన ఆవ్ నంప కెర్లి ఆగ్గు వాటీ బార్ జలన్.

12 మెలె, దేముడు మోసే తెన్ దిలి ఆగ్గుల్ సుద్ది అస్తి, ఒత్తచి ఎత్కి ఆగ్గు సుద్ది అస్సె, సత్తిమ్ చ తీర్పుల్ దెకయ్ తయ్, చెంగిల్ అస్సె.

13 దస్సి జలె, 'ఆవ్' మెనుమ, చెంగిల్ చి అంక మార్లన్ గే? నాయ్. ఆగ్గుల్ చెంగిల, గని జా చెంగిల్ తిలిన్ చి ఆగ్గు పిట్టవ పిట్టవ, పాపుమీ అంచి పెట్టి జేవ్ చి కామ్ కెర కెరయి మార్లి. దేముడు చి సెలవ్ కిచ్చొ మెలె, ఆగ్గుల్ వాట్ పాపుమ్ జేవ్ చి కామ్ కెర్తె తతిన్ తెయి పాపుమ్ క, పాపుమీ మెన మాన్సుల్ చినుత్ మెనయ్, పాపుమ్ ఆగ్గుల్ వాట్ పుల పుల కెర్లి మూర్కుమ్ జా గెతయ్ గే చినుక నెంజిలిన్ చి జేవ్ చి కామ్ పూర్తి డీసుకయ్ మెన, దేముడు సెలవ్ దిలన్.

14 జలె, దేముడు మోసే తెన్ దిలి ఆగ్గుల్ క దేముడు చి సుద్ది తిలి ఆత్మకయ్ దిలన, జోచి ఆత్మతెయ్ బెదితన, మెన ఆవ్ జానుమ్, గని ఆవ్ మాన్సుక మాములుమ్ మాన్సుచి ఆగి, మాములుమ్ మాన్సుచి బుద్ది అస్సె, చి ఈంజ ఆగ్తె ఆవ్ తతి ఎదిలి సేంపు పాపుమ్ అంక నేన్లి రితి అస్సె. పాపుమ్ చి గొతిమాన్సు ఆవ్.

15 ఆవ్ సొంత ఇండితిసి ఆవ్ అర్దుమ్ కెరనుక నెతిర్తసి. 'సత్తిమ్ కెరిందె' మెలె కి నెత్త తా, 'గర్చి' మెన ఆవ్ నెసితిసి ఆవ్ జర్గు కెర గెల సిక్కు జా గెతసి.

16 జలె, 'పాపుమ్' మెన ఆవ్ నెసితిసి ఆవ్ కెర్తసి జలె, జా పాపుమ్ నెసిలిసి తెన్ 'దేముడు దిల ఆగ్గుల్ చెంగిలి' మెన ఒప్పల్లి రితి జతయ్.

17 తెడిక తెడి దేముడు క ప్రేమ కెర్తె అవ్వి జా పాపుమ్ కెర్తెసా నెంజి, గని ఆవ్ మాన్సుచి ఆగి తిలి పాపుమీ జా కామ్ కెర్తయ్.

18 మెలె, అంచి సొంత సెక్కిక, అంచి ఆగి, అంక కిచ్చొ సత్తిమ్ నాయ్ మెన జాని. 'చెంగిల్ చి కెరిందె' మెన ఉచరిందె, గని మాన్సుచి అంచి

సెక్తిక జర్గు కెరుక నెతిరి.

19 నెత్త, 'చెంగిల్' మెన ఆవ్ ఇస్టుమ్ జలిసి జర్గు నే కెరై, నెసిలి పాపుమ్ జర్గు కెరయ్ గెల్తసి.

20 జలె, 'పాపుమ్' మెన ఆవ్ నెసితిసి ఆవ్ కెర్తసి జలె, దేముడుక ప్రేమ కెర్తొ అవ్వి జర్గు కెర్లిసి నెంజె, గని అంచి అగి జేవ్చి ఇస్టుమ్ కెర, పాపుమీ జర్గు కెర్తయ్.

21 దస్సి, కిచ్చొ ఆగ్గు డీస్తయ్ మెలె, 'నత్తిమ్ కెరిందె' మెన ఆవ్ ఉచర్లె పొది, పాపుమ్ పాసి రకితె అస్సె.

22 మెలె, అంచి పేట్ తెడి దేముడు మోసే తెన్ దిలి ఆగ్గుల్ రిసా ఇస్టుమ్ కెరుక ప్రేమయ్ అస్సి,

23 గని అంచి అగి కిచ్చొ ఆగ్గు జర్గు జతిసి ఆవ్ చినితసి మెలె, అంచి మెన్సుతె తిలిన్చి ఉప్పిరి జా వేరచి యుద్దుమ్ కెర, అంచి అగిచ వాటల్ తెన్ నెరవెర్నువ జతి పాపుమ్తె అంక దెర్ను సేడయ్తయ్.

24 అయ్యె! కెద్ది బాద సేడ్తసి, జా ఎత్కి రిసా! మొర్ను ఆన్తి ఈంజ పాపుమ్చి ఆగ్ తెంతో కో అంక రచ్చించువ కెరుల?

25 అమ్చొ ప్రబు జలో యేసుక్రీస్తుచి రిసా దేముడుక జోబర! జొయ్యి రచ్చించువ కెరెదె! జొయ్యి అమ్క జీనవ అస్సె! జలె, అప్పెచి మట్టుక అంచి మెన్సుక, జో తిలి ఆత్మక, దేముడు మోసే తెన్ దిలి ఆగ్గుల్చి రిసా దేముడుచి సేవ ఆవ్ కెర్తసి, గని అంచి ఆగ్క పాపుమ్చి సేవ కెర్తసి.

8

యేసు అమ్క పాపుమ్ తెంతో మొర్ను తెంతో పిట్టవ కెర్లిసి

1 జలె, క్రీస్తు జలో యేసుచి తెడిచ మాన్సుల్క జో జోచి పాపుమ్ పుంచ అస్సెచి రిసా లోకుమ్చ ఎత్కిక జో తీర్పు కెర్లి పొది జేవ్క కిచ్చొ సిచ్చ జంక నాయ్. నాసెనుమ్తె జేవ్ గెచ్చుక నాయ్.

2 కిచ్చొక మెలె, అమ్క ఏలుప కెరై పాపుమ్ చి మొర్నుచి ప్రమానుమ్చి సెక్తి తెంతో జీవ్ దెతి దేముడుచి సుద్ది తిలి ఆత్మచి ఆగ్గుతె అమ్క పిట్టవ కెరయ్ అస్సె. జో యేసుచి అత్తి, యేసుతె జర్గు జలి కామ్వాట్ విడ్డల్ కెరయ్ అస్సె.

3 మెలె, మాన్సుచి ఆగి పాపుమ్ ఏలుప కెరయ్. అమ్చి ఆగి ఏలుప కెర, ఆగ్గుల్ నెరవెర్నుప కెరుక తిలిసి పాపుమ్ పిట్టయ్లి. జాకయ్ ఆగ్గుల్ అమ్చి పాపుమ్ గెచ్చువుక అమ్క చెంగిల్ కెరుక నెత్తిర్తి. జలె, దేముడు అమ్చి పాపుమ్ గెచ్చువ అమ్క సుద్ది కెరుక మెన మాన్సుచి ఈంజ పాపుమ్చి ఆగ్ రూపుమ్ జోచొ సొంత పుత్తున్క ఈంజ లోకుమ్తె తెద్దయ్లన్. దస్సి పాపుమ్ వుంచిత బలి జో జతి రిసా అమ్చి అగి కామ్ కెర్తి పాపుమ్ జాక జెతికయ్, జో యేసుచి ఆగ్ వాట్ పాపుమ్క సిచ్చ కెర గెల తీర్పు కెర్లన్*.

4 కిచ్చొక పాపుమ్క తీర్పు కెర్లన్ మెలె, ఆగ్గుల్తె సంగిలి దొర్కు జలి పున్నిమ్ అమ్చితె నెరవెర్నుప జవున్ మెనయ్. కచితె మెలె, అమ్చి ఆగ్చవ ఆసల్క నాయ్ గని దేముడుచి సుద్ది తిలి ఆత్మచి సెక్తికయ్ కో ఇండుమ్దె గే, అమ్మి.

5 మాములుమ్ మాన్సుచి బుద్దిక, ఈంజ ఆగ్చవ అమ్చి పాపుమ్చవ ఆసల్క కో జితతి గే, ఈంజయి లోకుమ్తె తిలిన్ ఎత్కిక, ఈంజ ఆగ్చవ ఆసల్ తిలిన్ ఎత్కికయ్ కోర్ప జతతి, ఉచర్తె తత్తతి. గని దేముడుచి సుద్ది తిలి ఆత్మచి సెక్తిక కో జితతి గే, జా ఆత్మయి సికడ్డిన్కయ్ కోర్ప జతతి, ఉచర్తె తత్తతి.

6 ఈంజయ్ లోకుమ్చి, అమ్చి ఆగ్చవ ఆసల్ జర్గు కెర్తిన్క కోర్ప జతిసి మాన్సుక మొర్నుతె నెయెదె, గని దేముడుచి సుద్ది తిలి ఆత్మక కోర్ప జతిసి అమ్క జీవు దెతిసి, సేంతుమ్ దెతిసి జాఁ అస్సె.

7 మెలె, ఈంజ లోకుమ్చ, అమ్చి ఆగ్చవ ఆసల్ జర్గు కెర్తిన్క కో కోర్ప జతతి గే, జో ఎత్కి అదికారుమ్ తిలొ దేముడుక విరోదుమ్

* 8:3 8:3 యోహాను 12:31-33 దెక, కొలోస్సియల్ 2:15 దెక.

జా అస్తి, విరోధుమ్ కెర్తతి. దస్సి పాపుమ్చి ఆత్మ తిలస దేముడుచి ఆగ్గుల్ సూన్తి నాయ్, కెర్తి నాయ్. నెత్తిర్తి.

8 మాములుమ్ మాన్సుచి జోచి సొంత బుద్దిక, జోచి ఆగ్చ ఆసల్క ఇస్టుమ్ అయ్లి రితి ఇండితస, దేముడుచి ఇస్టుమ్ కెరుక నెత్తిర్తి, జోక సర్ద కెరుక నెత్తిర్తి.

9 తుమ్, మాత్రమ్, మాములుమ్ మాన్సుచి పాపుమ్బుద్దిచ నెంజున్, ఈంజ ఆగ్చ ఆసల్క జితస నెంజును, నాయ్ గెద? దేముడుచి సుద్ది తిలి ఆత్మ తుమ్చి పెట్టి అస్సి జలె, జోచి ఆత్మకయ్ జితసు. కేన్ మాన్సుచి పెట్టి క్రీస్తుచి ఈంజ ఆత్మ తయె నాయ్ గే, జో మాన్సు క్రీస్తుచో నెంజె.

10 తుమ్చి పాపుమ్చి రిసా తుమ్చ ఆగ్ మొర్ల రిత జా అస్తి. గని క్రీస్తు తుమ్చి పెట్టి అస్సి జలె, క్రీస్తుచి పున్నిమ్చి రిసా జోచి ఆత్మక తుమ్ జివ్వి అస్సున్.

11 జో యేసుక అన్నె జియణ్ణో దేముడు అబ్బొన్చి ఆత్మ తుమ్చి పెట్టి జితయ్ జలె, క్రీస్తు జలొ జో యేసుక మొర్లు తెంతో విడ్డల్ కెర జియణ్ణో జో అబ్బొసి, మొర్త తుమ్చయ్ ఆగ్క కి జియడెదె. తుమ్చి పెట్టి జితి జోచి ఆత్మవాటు, తుమ్చి పెట్టి జో దెతి జోచి ఆత్మకయ్ జియడెదె.

యేసు తెన్ అమ్ అబ్బొన్చ పుత్తర్లు

12 జాకయ్, బావుడ్లు, అమ్ పూచి జా అస్సుమ్. జా పూచి అమ్ కిసి కుట్టవుక? మాములుమ్ మాన్సుచి బుద్దిక నాయ్, అమ్చి ఆగ్చ ఆసల్ జర్లు కెర్తినక నాయ్. జా ఎత్తి పోన.

13 కిచ్చొక మెలె, మాములుమ్ మాన్సుచి బుద్దిక, తుమ్చి ఆగ్చ ఆసల్క, తుమ్ జితసు జలె, ఆత్మక మొర్తె. గని దేముడుచి సుద్ది తిలి ఆత్మచి సెక్కిక ఈంజ ఆగ్చుచ కమొ గెచ్చవనయ్ గెల్తె జలె, మార్తె జలె, ఆత్మక జిస్తె.

14 కిచ్చొక మెలె, దేముడుచి సుద్ది తిలి ఆత్మసెక్కిక ఇండితొ ఎత్తి మాన్సు, జో దేముడుచి పుత్తర్లు జవుల.

15 మెలె, జోచి ఆత్మ తుమ్చి పెట్టి అయ్లిసి తుమ్క గొతిమాన్సుల్ కెర బియడ్డిసి నెంజె. తుమ్చి అగ్గెచి బుద్దిచి రిసాచి బిడ్డి తెన్ తుమ్ అప్పె తంక నాయ్. జోచి ఆత్మ తుమ్చి పెట్టి అయ్లిసి తుమ్క జోవయించ పుత్తర్లులి కెర్లిసి. అప్పె “అంచ పుత్తర్లు తుమ్” మెన జో అమ్క దెకితయ్, చి “ఓ బ, ఓ బ” మెన జోక అమ్ ఉంక్రయ్లె, కిచ్చొ సెక్తిక ఉంక్రయ్తనుమ్ మెలె,

16 జోచ బోదల్ అమ్ జలిన్చి రిసా, జోచి సొంత ఆత్మ అమ్చి ఆత్మతె జోచ బోదల్ మెన సాచి దెతయ్చి, దస్సి ఉంక్రయ్తనుమ్.

17 అన్యె, జోవయించ బోదల్ జలమ్ మెలె, జోచి పుత్తున్ జలో క్రిస్తు తెన్ జో దేముడుక తిలిన్తె అమ్క వాట జెయెదె. జా వాట అమ్క కిసి సేడెదె మెలె, జో యేసు సేడ్ల బాదల్తె అమ్ బెద ఓర్పువ జా జీన్లె, జోచి వరలోకుమ్తెచి ఉజిడ్తె జో గవురుమ్ జతిన్తె కి బెదుమ్దె.

18 జలె, బాదల్ సేడ్డిన్చి రిసా, చి యేసు తెన్ అమ్ గవురుమ్ జతిన్చి రిసా కిచ్చొ మెంతసి మెలె, దేముడు జా ఆకర్ దీసిక అమ్క కెర్లి గవురుమ్చి రిసా ఉచర్లె, ఈంజ ఉగుమ్చ బాదల్ కెత్తి జలెకి కిచ్చొ నెంజె.

19 జో దేముడుచ పుత్తర్లు అమ్ జలిసి, జా దీసిక అమ్ గవురుమ్ జతిన్తె పూర్తి రుజ్జు జతె ఎదక జెర్మయ్లిన్ ఎత్తి ఆస తెన్ రకితె అస్సె.

20 కిచ్చొక మెలె, తయార్ జలిన్ ఎత్తి అగ్గె తెంతో కిచ్చొ కిచ్చొ అల్లర్ సేడ సిక్కు జా అస్సె. జాచి ఇస్టుమ్క నాయ్, గని “కచితుమ్ నమయుమ్ జా అయ్లి మెలె చెంగిల్ కెరిందె” మెన దేముడుచి సెలవ్ నెరవెర్పువ జతిన్కయ్ ‘కచితుమ్ జర్లు జయెదె’ మెలి రితి దయిరిమ్ తెన్ తిలి రితి రకితయ్.

21 మెలె, దేముడుచ బోదల్ పూర్తి విడ్డల్ జా గవురుమ్ జతి పొదిక జెర్మయ్లిసి ఎత్తి కి జా పాడ్ జతిన్తె నాసెనుమ్ జతిన్తె సేడ్లిన్ తెంతో విడ్డల్ జయెదె.

22 తేర్బోద లడెన్ జంక మెన కంట్లు పాచ జా అయ్లి పొది కిసి కస్టల్ నొప్పుల్ జా టింకితయ్ గే, దస్సి, జెర్మన్ జలిన్ ఎత్తి మొత్తుమ్

అప్పె ఎద కస్టల్ నొప్పుల్ తెన్ టింకయ్తయ్ మెన జానుమ్.

23 తెద్దిలి నాయ్ అమ్క జెతికయ్ దేముడుచి సుద్ది తిలి ఆత్మచి మొదొల్చి వంటొ అమ్చి పెట్టి అస్సె. జలె, “అమ్చ ఆగ్గక, ఈంజ లోకుమ్చ బాదల్ ఎత్తి తెంతొ, దేముడు అన్నె గెనన్లిసి, అమ్ జోచ పుత్తర్లు జలిసి, కెయడ పూర్తి డీసెదె? అమ్ అన్నె కెద్ది రకుక?” మెన ఆమ్ అమ్చి పెట్టి టింక టింకయ్ రకితసుమ్.

24 ‘అమ్చ ఆగ్గక మార్పువ కెర్తిన్ జో జర్లు కెర్తిన్కయ్ జో అమ్క రచ్చించువ కెర అస్సె’ మెనయ్ ఆస తెన్ రకితసుమ్. జలె, ఉచరుమ, దెకిలిసి జర్లు జలిన్కయ్ ‘ఆస తెన్ రకితసుమ్’ మెనుక బెదె నాయ్. దెకిలిసి జర్లు జలిన్కయ్ కో ఆస తెన్ రకితి నాయ్.

25 గని అప్పెక నే దెకిలిన్క ‘కచితుమ్ జర్లు జయెదె’ మెన అమ్క ఆస తిలె, నిదానుమ్ తెన్ రకుమదె.

అమ్చ ప్రార్థనల్తె కి దేముడుచి సుద్ది తిలి ఆత్మ అమ్క తోడ తత్తిన్

26 దేముడుచి సుద్ది తిలి ఆత్మ అమ్క సెక్తి నెంజిలిన్ ఎత్తితె కి అమ్క తోడు తత్తయ్. ప్రార్థన కెరుక జలె, కీసి ప్రార్థన కెర్కుగే నేనుమ్, గని దేముడుచి సుద్ది తిలి ఆత్మ సొంత అమ్చి పెట్టి అమ్చ ప్రార్థనల్తె బెద అమ్ లట్టబుక నేన్లిన్, సంగుక నెత్తిర్లిన్క తోడు తత్తయ్, అమ్క సికడ్తయ్, చి అమ్ సంగుక నెత్తిర్లిన్క లట్టబుక నేన్లిన్క అమ్చి పెట్టి అమ్ టింకితిన్చి అర్దుమ్ బెదయ్తయ్.

27 జలె, జోచి సుద్ది తిలి ఆత్మ అమ్ జోచయ్ జల అమ్చ ప్రార్థనల్తె తోడు తా, దేముడుచి ఇస్టుమ్ తిలిసి ఒత్త బెదయ్తయ్. జోచి ఆత్మ కిచ్చొ అర్దుమ్ బెదయ్తయ్ గే జొయ్యి జానె. దస్సి, అమ్చి పెట్టి తిలిన్ ఎత్తి పరిచ్చ కెర్తోసాచి ఆత్మ సొంతయ్ అమ్చ ప్రార్థనల్తె అమ్క తోడ తత్తయ్, బెదితయ్.

దేముడు అమ్క జినయ్తిసి డిట్టుమ్ కెర్తిసి

28 అన్నె కిచ్చొ దయిరిమ్ జతనుమ్ మెలె, దేముడుక ప్రేమ కెర్లనక, మెలె జోచయ్ జంక మెన దేముడు జోచి ఇస్తుమ్క బుకార్లనక కిచ్చొ బాదల్ అయ్లె కి, జేవ్ బాదల్తె కి చెంగిల్ పలితుమ్ దెర్తి రితి జా ఎత్తి చెంగిల్క బెదిత్ రితి జో నెరవెర్పుప కెర్తయ్ మెన జానుమ్.

29 కో యేసుక్రీస్తుక నంపజా జో దెతి రచ్చున నజనుక గే జో దేముడు అగ్గె తెంతో జానె. జలె, జోచొ సొంత పుత్తున్ యేసుచ రిత అమ్ జంక మెన అమ్కయ్ జో నిసాన, జా జర్లు కెరుక ఒప్పున్లన్. దస్సి, అమ్ ఒగ్గర్ ఒగ్గర్ బావుడ్సివొ జలనక యేసు తొల్పుర్ జలన్.

30 జలె, 'యేసుచ రిత జతు' మెన జో కక్క కక్క నిసాన్ల గే, జోవయింక బుకార్లన్. కక్క కక్క బుకార్లన్ గే, జోవయించి పాపుమ్ పుంచ 'అప్పె తెంతో పున్నిమ్ జా అస్తి' మెలి రితి దెకిలన్, చి కచి కచి పాపుమ్ పుంచ 'పున్నిమ్ జా అస్తి' మెలి రితి దెకిలన్ గే, "జోవయింక పరలోకుమ్తె కడ నెయిందె, అంచి ఉజిడతె అంచి గవురుమ్తె బెదయిందె" మెనయ్ ఒప్పున్లన్, చి జర్లు కెరెదె.

31 జలె, ఈంజ ఎత్తి బెదవ కిచ్చొ మెనుమ? దేముడు అమ్క తోడు అస్సె జలె, కో అమ్క పాడ్ కెరుక తెరితి! నెత్తిర్!

32 జోచొ సొంత పుత్తున్క బాదల్ నే పిట్టయ్తె, అమ్ ఎత్తిజిన్క పాపుమ్ తెంతో రచ్చించుప కెర్తి రిసా జోక బలి కెర మొర్లుతె సొర్లు కెర దిలో. అమ్చి ఉప్పిరి జోవయింక తెద్ది ప్రేమ తిలి జలె, జో పుత్తున్క దెతిసి ఎత్తితె అమ్క కి వాట దెయె నాయ్ గే? దెయెదె.

33 దేముడు నిసాన్లచి ఉప్పిరి కో కిచ్చొయ్ నింద వయడుక తెరితి గే? కోయి నెత్తిర్! జో దేముడు సొంతయ్ అమ్చి పాపుమ్ పుంచ అస్సె. అమ్క 'పున్నిమ్' మెలి రితి దెకితయ్.

34 అమ్ జో నిసాన్లనక కో తీర్లు కెర, నాసెనుమ్తె తెద్రవుక తెరితి గే? కో నెత్తిర్! మొర అన్నె ముక్కిమ్క అన్నె జివ్ జా ఉట్టిలో క్రీస్తు జలొ యేసు అబ్బొన్ దేముడుచి ఉజెతో పక్క వెన అస్సె. జొయ్యి అమ్క సిచ్చ దెయెదె గే? నాయ్. జో సొంత అమ్చి పచ్చెనచి తీర్లు సంగితయ్.

35 జలె, క్రీస్తుచి ప్రేమ తెంతో కో జలెకి కిచ్చొ జలెకి అమ్క పిట్టవ కెరుక తెరితి గే? జోవయింక అమ్క వీడుప కెరుక బాదల్ జవున్ తెరితి గే? ఇర్సుల్ జవున్ తెరితి గే? మాన్సుల్ కెర్త గోసల్ అల్లర్ తెరితి గే? చువ్వె తతిసి జవున్ తెరె గే? పాలల్ నెంజిలిన్ జవున్ తెరె గే? ప్రమాదల్ జవున్ తెరితి గే? మొర్తి సిచ్చు జవున్ తెరె గే? కిచ్చొయ్ అమ్క జోక వీడుప కెరుక నెతిరి!

36 దేముడుచ కొడతె పూర్ణమ్ రెగ్గయ్లి రితి,
†“తుచి నావ్చి రిసా ఒండి మెద్దెనె అమ్క మార్తతి,
‘కండ కత మెండల్ జేవ్’ మెలి రితి అమ్క దెకితతి”
మెన రెగ్గ అస్సె.

37 జో అమ్క ప్రేమ కెర అమ్చి పాపుమ్ వయిలోసాచి సెక్తిక ఇన బాదల్ ఎత్కితె అమ్ పూర్తి జిన అస్సుమ్, జినుమ్దె.

38 అమ్క కిచ్చొ పూర్తి దయిరిమ్ మెలె, మొర్ను జవున్, జివ్ తతిన్ జవున్, కేన్ లోకుమ్చ దూతల్ జవున్, బూతల్ జవున్, అప్పె జర్గు జతిసి జవున్, పడ్డొక జర్గు జతిసి జవున్, కేన్ లోకుమ్చ సెక్తివొ జవున్,

39 ఈంజ లోకుమ్క ఉప్పిరి తిలిసి జవున్ ఎట్టొ తిలిసి జవున్, జెర్మున్ జలిసి అన్నె కిచ్చొ జలెకి, అమ్చొ ప్రబు జలొ క్రీస్తుయేసు అమ్క దొర్కు కెర్లి దేముడుచి ప్రేమ తెంతో వీడుప కెరుక నెత్తె మెన అంక పూర్తి దయిరిమ్ అస్సె.

9

దేముడు పూర్ణమ్ నిసాన్ల యూదుల్

1-2 అంచి పెట్టి ఒగ్గర్ దుకుమ్ బాద కెడ్డొడ్ తెదొడ్ తాఁ గెతయ్. నిజుమి, క్రీస్తుచొ మాన్సు ఆవ్ సత్తిమ్ సంగితసి. జా దుకుమ్చి రిసా అంచి ఆత్మతె దేముడుచి సుద్ది తిలి ఆత్మ అంక సాచి జతయ్.

3 అంచి దుకుమ్ కిచ్చొక మెలె, జయ్యి సెకుమ్తె ఆవ్ జెర్మిలి రిసా జేవ్ అంచ సొంత మాన్సుల్ అంచ బావుడ్లు జవుల, చి జోవయింక

† 8:36 8:36 కీర్తనలు 44:22.

‘యేసుక్రీస్తుక సంపజతు’ మెన అంక కెద్ది ఆస మెలె, ఆచ్ క్రీస్తు తెంతో పిట్టవ జా నాసెనుమ్తె గెలె జోచి రచ్చన జోవయింక దొర్కు జతి జలె, జోచి ఉప్పిరచి అంచి ప్రేమక జోవయింతె తెంతో విడ్డల్ జతయ్.

4 జోవయింది రిసా కిచ్చొక అంక తెద్ది ఆస అస్సె మెలె, ‘అంచయ్ మాన్సుల్ జా అంకయ్ బక్తి కెర్తు, అంచి గవురుమ్ దెకయ్తు’ మెన దేముడు పూర్ణుమ్ నిసాన * ఇస్రాయేలులు జోచ పుత్తర్వులు జతి జోచి †ఉజిడి, జోవయింది నెడిమి తతి వరుమ్ పూర్ణుమ్ తెంతో దేముడు జోవయింక జోచి ‡ప్రమానుమ్ కోడు దిలన్, జోచ సీఆగ్గుల్ దిలన్, జోచి * బక్తి కెర్తి ఆగ్గు దిలన్, †రచ్చించుప కెర్తొసా జెంక దిలిన్చి రిసాచ ప్రమానల్ దిలన్.

5 అబ్రాహామ్, ఇస్సాకు, యాకోబు జోవయించయ్ పూర్ణుమ్చ. అన్నె, జో మాన్సు జలిన్చి జెర్మున్క దెకిలె, జోవయింది సెకుమ్తె రచ్చించుప కెర్తొసా జలో క్రీస్తుయి జెర్మిలన్. †ఎత్తిచి ఉప్పిరి అదికారుమ్ తిలో దేముడుక జోబర! కెయ్క తెయ్క జోవయింక గవురుమ్ తవున్! ఆమేన్.

6 గని యూదుల్ ఒగ్గర్జిన్ అన్మానుమ్ జలిసి దెకిలె ‘దేముడు పూర్ణుమ్ సంగిలి ప్రమానుమ్ కోడుక పిట్టి’ మెన తుమ్ ఉచర నాయ్. పిట్టె నాయ్. కిచ్చొక ఇసి మెంతసి మెలె, సీఇస్రాయేలుచి సెకుమ్తె జెర్మిలసతె సగుమ్జిన్క ‘ఇస్రాయేలులు’ మెనుక నెంజె,

7 * అబ్రాహామ్చి సెకుమ్తె జెర్మిలస సగుమ్జిన్క ‘జోవయించ

* 9:4 9:4 ‘ఇస్రాయేలులు’ మెలె, తొలితో యాకోబు పూర్ణుమ్చొక ఎత్తి అదికారుమ్ తిలో దేముడు జా నాచ్ తిలో, ఆదికాండుమ్ 32:28. పడ్డె జోవయింది సెకుమ్ మొత్తుమ్క ‘ఇస్రాయేలులు’ మెన నాచ్ తిలన్. † 9:4 9:4 నిర్ణమకాండుమ్ 33:18-23. ‡ 9:4 9:4 ఆదికాండుమ్ 15:18, 17:1-21, 28:13, నిర్ణమకాండుమ్ 2:24, 6:2-8, 19:5, 34:10-27, సమాయేలు దొన్నిచి పుస్తకుమ్ 23:5. § 9:4 9:4 నిర్ణమకాండుమ్ 20:1-17, ద్విత్వీయోపదేశ కాండుము 5:1-22, 10:1-5. * 9:4 9:4 నిర్ణమకాండుమ్ 25-31 అద్యయల్. † 9:4 9:4 యెసయా 53 అద్యయిమ్, యిర్మీయా 23:5-6. ‡ 9:5 9:5 నెంజిలె, ‘ఎత్తిచి ఉప్పిరి అదికారుమ్ తిలో దేముడు జొయ్యి. జోవయింక జెయ్యి!...’. § 9:6 9:6 మెలె ‘యాకోబుచి’. * 9:7 9:7 యాకోబుక అబ్రాహామ్ మంత్రొ అన్నొసి; అబ్బొన్చొ అబ్బొన్ జయెదె.

బోదల్ జవుల' మెనుక నెంజె. అబ్రాహామ్ చి పెట్టిచ సగుమ్ జిన్ జోచ నిజుమ్ చ బోదల్ నెంజిలిన్ చి అర్దుమ్ కిచ్చొ మెలె, పూర్గుమ్ దేముడు అబ్రాహామ్ క,

† "తుచి సెకుమ్ చ ఎత్తితె ఎక్కి ఇస్సాకుచి తెడి జెర్మిలసకయ్

'తుచయ్' మెనిందె"

మెన ప్రమానుమ్ సంగిలన్.

8 ఈంజ టాలిచి అర్దుమ్ కిచ్చొ మెలె, మాములుమ్ †ఆగ్ జెర్మిన్ క జోచి సెకుమ్ తె జెర్మిలస నాయ్, గని దేముడుచి క్రీప్రమానుమ్ కయ్ జెర్మిలసక 'అబ్రాహామ్ చి సెకుమ్ చ' మెనుక జయెదె.

9 జా ప్రమానుమ్ సంగిలి పొది దేముడు అబ్రాహామ్ క,

* "సంగిలి సమయమ్ జా అయ్ లి మెలె, ఆవ్ అన్నె జెయిందె,

చి సారాక పుత్తుది జెర్మెదె"

మెన ప్రమానుమ్ సంగిలన్.

10 జా ఏక్, అన్నె, అమ్ చొ పూర్గుమ్ చొ ఇస్సాకుచి తేర్చి రిబ్కా జో ఎక్కి మున్నున్ తెన్ కల్వల్ క అంగి జలి పొది,

11 జేవ్ కల్వల్ ఇన్నె నే జెర్మితె అగ్గె, జోవయింతె కో సత్తిమ్ కో పాపుమ్ కెరుక నేతయ్ జలెకి, 'కచ కమెచి రిసా నాయ్, గని కక్క నిసాన్ల అంచి ఇస్టుమ్ తయెదె గే, జోవయింకయ్ నిసాన్' మెన మాన్సుల్ క నిసాన్ బుకార్తి జోచి ఇస్టుమ్ జెయిమ్ జంక మెనయ్,

12 రిబ్కాక దేముడు,

† 9:7 9:7 ఆదికాండుమ్ 21:12. అబ్రాహామ్ చి తేర్చి సారాక బోదల్ నెంజితికయ్, 'అంచి గొతిమాన్సు జలి హాగరు తెన్ అంచి నావ్ తెన్ బోడ పాయి' మెన సారా సంగితికయ్, అబ్రాహామ్ దస్సి కెర్లన్, చి 'ఇష్టాయేల్' మెన పుత్తు పాయిలన్. ఆదికాండుమ్ 16 అద్యయిమ్. † 9:8 9:8 తేర్చి సారాచి గొతిమాన్సు హాగరు తెన్ అబ్రాహామ్ పాయిలో పుత్తున్ ఇష్టాయేల్ ఆగెతె జెర్మిన్ జలొసా జయెదె. మాన్సుచి ఇస్టుమ్ కయ్ పాయిలోసా జోచి రిసా మాములుమ్ అబ్రాహామ్ చి సెకుమ్ తె జెర్మిలసక ఇష్టాయేల్ చి పెట్టి జెర్మిలస, ఇష్టాయేల్ చి సెకుమ్ చ టాలి జయెదె.

§ 9:8 9:8 ఇస్సాకు ఎత్తి అదికారుమ్ తిలో దేముడుచి ప్రమానుమ్ కయ్ జెర్మిలోసాచి రిసా ఎత్తి అదికారుమ్ తిలో దేముడుచి ప్రమానుమ్ నంప కెర్లసక, మెలె యేసుక్రీస్తుక నంప కెర్లసకయ్ ఇస్సాకుచి పెట్టి జెర్మిలస ఇస్సాకుచి సెకుమ్ చ టాలి జయెదె.

* 9:9 9:9 ఆదికాండుమ్ 17:19-21, 18:10, 14.

†“దకిలోచి సేవ వెల్లో కెరెదె”

మెన సంగిలన్.

13 అన్నె, అన్నెక్తె జో,

‡“దకిలో జలో యాకోబుక ప్రేమ కెర్లయ్,
గని వెల్లో జలో ఏసావుక విరోదుమ్ జలయ్”

మెన రెగ్డయ్లన్.

14 జలె, అమ్ కిచ్చొ మెనుక? ఎత్కి అదికారుమ్ తిలో దేముడు కెర్లిన్క ‘నాయిమ్ నాయ్, సత్తిమ్ నాయ్’ మెనుక జయెదె గే? జయె నాయ్. దస్సి మెనుక నాయ్.

15 కిచ్చొక మెలె, మోసేక జో,

§“కచి ఉప్పిరి దయ తియిదె గే, తియిదె.

కక్క కన్కారుమ్ దెకిన్దె గే, దెకిన్దె”

మెన సంగిలన్.

16 కేన్ మాన్సుచి ఇస్టుమ్తె నాయ్, కేన్ మాన్సుచ కమెతె నాయ్, గని దేముడుచి దయతె.

17 అన్నె, దేముడుచ కొడొతె రెగిడ్డి రితి, పడ్డొ ఇస్రాయేలుల్క అల్లర్ కెర్తె తిలో ఐగుప్తు దేసిమ్చొ రాడ్ జివ్ తిలో పరో రానొక దేముడు,

*“ఒండి లోకుమ్తె అంచి నావ్ సాడుప జవున్ మెన,
తుచితె జర్గు జతి కామ్తె అంచి సెక్తి దెకయ్తి రిసాయి
తుక ఆవ్ టీవడ అస్సి”

మెన సంగ తెద్రయ్లన్.

18 కచి ఉప్పిరి జోచి దయ తియెదె గే, జోచి ఇస్టుమ్. కచి జివ్ రాడ్ కెరెదె గే, జోచి ఇస్టుమ్!

19 దస్సి సంగిలె, “దస్సి జలె, దేముడుచి ఇస్టుమ్క జో కెర్తిసి జోచి పూచి. జాకయ్, జో కీసి కక్క పాపుమ్ వయడుక జయెదె! అమ్ రచ్చించుప జంక జోచి సెలవ్ నెంజిలె, కీసి అమ్చి పూచి జయెదె! జా పాపుమ్ వయుక కీసి అమ్చి పూచి జయెదె!” మెంతె,

† 9:12 9:12 అదికాండుమ్ 25:23. ‡ 9:13 9:13 మలాకీ 1:2-3. § 9:15

9:15 నిర్గమకాండుమ్ 33:19. * 9:17 9:17 నిర్గమకాండుమ్ 9:13-16.

20 గని, ఓ మాన్సు, తుయి కొన్సొ, చి దేముడుచి కోడుక జబాబ్ అన్నె దెతె! మత్తిక తెయార్ కెర్లి గేడి జాక తెయార్ కెర్లి కుమ్మరొక †“కిచ్చొక ఈంజయి రూపుమ్ అంక దిలది?”

మెన పునెదె గే?

21 నాయ్. జా మత్తిచి ఉప్పిరి కుమ్మరొక పూర్తి అదికారుమ్. జయ్యి మత్తిబెండక సూటిచి గవురుమ్చి కెరెదె గే, గవురుమ్ నెంజిలి కామ్చి రిసాచి కెరెదె గే, జోచి ఇస్తుమ్.

22-23 జలె, పాపుమ్చి ఉప్పిర్చి జోవయించి కోపుమ్ దెకవుక మెన, జోచి సెక్తిచి రుజ్జు దెకవుక మెన దేముడుక ఇస్తుమ్ జలెకి, జోచి పరలోకుమ్చి ఉజిడితె, గవురుమ్తె పడ్డొక బెదవనుక మెన జో అగ్గె తెంతొ నిసాన్ల గేడివొక జో కెర్లి ఎదివాట్ దయ జాన్తి ఎదక జోవయించి సిచ్చు జత నాసెనుమ్తె గెత, గేడివొ ఒండి పాపుమ్ జో మదెనె ఒగ్గర్ సేంపు ఓర్పుప జా రకితె తిలె, జోచి దయ!

24 జో ఎదివాట్ దయ కెర్ల నిసాన్ల గేడివొ కొన్సొ మెలె, ఆము. ఆమ్ కొన్సొ మెలె, యూదుల్ తెంతొ ఆమ్ సగుమ్జిన్క జో బుకారా అస్సె, గని యూదుల్ నెంజిలన తెంతొ కి అన్నె మాన్సుల్క బుకారా అస్సె.

25 జోచ కబుర్లు పూర్లుమ్ సంగితె తిలొ హోసెయ అత్తి దేముడుచ కొణ్ణె రెగిడ్లి రితి,

‡“ ‘అంచయ్ మాన్సుల్’ మెన ఆవ్ అగ్గె నే సంగిలసక

తెదొడ్క ‘అంచయ్’ మెనిందె.

ఆవ్ అగ్గె ప్రేమ నెంజిలిన్క ‘ఆవ్ ప్రేమ కెర్లిసి’

మెనిందె.”

26 §“అన్నె, ‘తూమ్ అంచ మాన్సుల్ నెంజుసు’ మెన అగ్గె జో సంగిలి టాన్తె

తెదొడ్క ‘జీవ్ తిలొ, జీవ్ దెతో దేముడుచ పుత్తర్లు జేవ్’ మెన మాన్సుల్ సంగుల.”

† 9:20 9:20 యెసయా 29:16, 45:9. ‡ 9:25 9:25 హోసెయ 2:23. § 9:26 9:26 హోసెయ 1:10.

27 అన్నె, ఇస్రాయేలులు మెల అమ్చ యూదుల్చి రిసా దేముడుచ కబుర్లు సంగితె తిలో యెసయా పూర్ణుమ్చొ కిచ్చొ సాడుప కెర్లి రితి జలన్ మెలె,

*“సముద్రుమ్చి ఒడ్డుచి ఇస్కచ గిడ్డల్ కెత్తి జవుల గే, ఇస్రాయేలుచ పుత్తర్లు జల యూదుల్ దస్సి ఎత్తివాట్ జిన్ జవుల, గని జోవయింతె సేంసీల రిత ఎక్కి దొన్ని రిత రచ్చించుప జవుల.

28 కిచ్చొక మెలె, ఈంజ లోకుమ్చ మాన్సుల్చి ఉప్పిరి కిచ్చొ సిచ్చుచి తీర్పు ప్రబు ఉచరెదె గే, సత్తు తెన్ తంద్రతెన్ జో జర్గు కెరెదె.”
మెన రెగ్గ అస్సె.

29 అన్నె జా నే జతె అగ్గె తెంతో జో యెసయాచి అత్తి జో దేముడు ప్రబు రెగ్గయేలి రితి జర్గు జా అస్సె. కిచ్చొ మెన మెలె, †“అమ్క సిచ్చు నే జత బోదల్ సగుమ్జిన్ సేన్సి రితి పరలోకుమ్చ ఎత్తి అదికారుమ్ తిలో దేముడు ప్రబు సెలవ్ దెతో నాయ్ జలె, ‡సాదొమ అన్నె గొమొరా పట్టల్చి రితి సిచ్చ జా కుడ్డె నాసెనుమ్ జతమ్”
మెన రెగిడ్డి కోడు.

30 జలె, కిచ్చొ మెనుమ? ఈంజయి. సత్తిమ్ వాట్ నే చజిల యూదుల్ నెంజిలస దేముడు దెతి పున్నిమ్ జా అస్తి. కీసి మెలె, నముకుమ్ వాట్. యేసుక్రీస్తుక నంపజలి వాటు.

31 గని ఆగ్గుల్ వాట్ పున్నిమ్ జంక ఉచర్ల అమ్చ ఇస్రాయేలుల్ మెల యూదుల్ ఆగ్గుల్చ కమ్మొవాట్ పున్నిమ్ ఇండుక నెత్త ఆగ్గుల్ తిలిసి నెరవెర్చుప నే కెర, ఓడుప జల.

32 నముకుమ్ వాట్ నాయ్ గని కమొ వాటీ రచ్చన దొర్కు కెరనుక ఉచర్ల. వట్టెచొ పత్తె పిప్ర సేడ్ల రిత జాఁ ఓడుప జా అస్తి.

* 9:27 9:27 యెసయా 10:22, 23. † 9:29 9:29 యెసయా 1:9. ‡ 9:29 9:29 అదికాండుమ్ 13:13, 18:20, 19:24-25.

33 వట్టెచొ పత్తురు మెలె, యేసుక్రీస్తు. యేసుక్రీస్తుచి ఉప్పిరి నంపజతిసి నే జతిన్చి రిసా అన్నెక్ కోడుతె తిలి రితి. కేన్ కోడు మెలె, క్రి“ఈందె, ‘సీయోను’ మెల అమ్చ యూదుల్చి వట్టె ఏక్ పత్తురు ఆవ్ గల్లసి.

జేవ్ నంప నెంజ జో పత్రె, జో సాప్రయ్ పిసిర సేడుల.

గని జోచి ఉప్పిరి కో జో నముకుమ్ తివుల గే,

జెవ్వి కచితుమ్ లాజ్ జతి నాయ్, ఓడుప జతి నాయ్”

మెన రెగ్గ అస్సె.

10

యేసుక్రీస్తుకయ్ నంపజలెకయ్ రచ్చించుప జంక జతిన్

1 బాపుడ్లు, నంపనెంజిల అమ్చ యూదుల్చి రిసా “జేవ్ కి నంపజా రచ్చించుప జతు” మెన అంక జీవు డడ్డ దేముడుక ఆవ్ ప్రార్లన కెరై తత్తసి.

2 నిజమి దేముడుచి సేవ కెరుక యూదుల్ ఆస తెన్ అస్తి మెన ఆవ్ సాచి జతసి, గని జో దెతి రచ్చన కిసిచి గే అర్దుమ్ నే కెరన పొరపాల్ జా గెచ్చ అస్తి.

3 మెలె, దేముడు దెతి పున్నిమ్ కేన్ వాటు దొర్కు జతయ్ గే, అర్దుమ్ నే కెరంతె జోవయించి సొంత సెక్తిక పున్నిమ్ జంక ఉచర. దేముడు పున్నిమ్ దెతి వరుమ్ నజన్తి రితి దాక్ కెరంతి నాయ్.

4 మెలె, ఎక్కి క్రీస్తుచి, తెడి అగ్గుల్ సికడ్డి పున్నిమ్ దొర్కు జతయ్, అగ్గుల్తె కోర్ప జా జలిసి కుట్టయ్తోసా నెరవెర్చుప కెర్తొసా జొయ్యి, చి జోచి ఉప్పిరి కో జోవయించి నముకుమ్ తివుల గే, జోవయించి పాపుమ్ జో పుంచెదె.

5 మోసేచి అత్తి రెగిడ్లిసి ఏక్ కిచ్చొ అస్సె మెలె,

*“అగ్గుల్తెచి పున్నిమ్ కో పూర్తి నిదానుమ్ ఇండుల గే,

జేవ్చి తెన్ జివుల”

మెన రెగ్డ అస్సె.

6† గని నముకుమ్ వాట్ పున్నిమ్ జతిన్ చి రిసాచి ఏక్ కోడు ఉచరుమ. “పరలోకుమ్ తె కో వెగ గెచ్చుల? ‘క్రీస్తుక ఉత్తవ కడ ఆన్ తి రిసా’ మెనుమ.”

7 నెంజెలె, “బూలోకుమ్ క ఎట్టో లోకుమ్ తె కో ఉత్త గెచ్చుల?”; “క్రీస్తుక మొర్ను తెంతో వెగవ కడ ఆనుక” మెనుమ. నాయ్, దస్సి మెన నాయ్.

8 నముకుమ్ వాట్ చి రచ్చనచి కోడు కేనె గెతిసి నెంజె, కిచ్చొ కామ్ కెర్తిసి నెంజె. రచ్చన దూరి నాయ్. రచ్చనచి కోడు పాసి అస్సె. తుమ్ చి చోడితె, తుమ్ చి పెట్టి అస్సె. మెలె, క్రీస్తుచి ఉప్పిరిచి నముకుమ్ చి రిసా అమ్ సుబుమ్ కబుర్ బోదన కెర్తసుమ్. జయ్యి కోడు.

9 మెలె, యేసుక ‘పరలోకుమ్ చొ ప్రబు జొయ్యి’ మెన మాన్సుచి మొక్కె కో సంగ ఒప్పన, ‘మొర్ను తెంతో దేముడు అబ్బొసి జోక విడ్డల్ కెర అన్నె జియడ్లన్’ మెన పెట్టి నిదానుమ్ నంపజవుల గే, జెవ్వి రచ్చించుప జవుల.

10 కిచ్చొక మెలె, †మాన్సు జోచి పెట్టి నంపజలె, జోచి పాపుమ్ పుంచి జయెదె. జోచి చోడి ఒప్పనై, జో రచ్చించుప జయెదె.

11 దేముడుచ కొణొతె రెగ్డయ్ లిన్ ఉప్పిరి ఏక్ దెకిలమ్. కిచ్చొ మెలె, § “జోచి ఉప్పిరి జోచి నముకుమ్ తిలో కేన్ మాన్సుకి కచితుమ్ లాజ్ జతి నాయ్ ఓడుప జతి నాయ్” మెన రెగ్డ అస్సె.

12 కొన్న మెలె, యూదుల్ క గ్రిసు దేసిమ్ చ సుదల్ క కక్కయ్ దేముడు తేడ దెకె నాయ్. జొయ్యి ప్రబు ఎత్కికయ్ ప్రబు, చి జోక నంపజా, జో దెతి రచ్చన నజితో ఎత్కి మాన్సుక జోచి వరుమ్ జో దెయెదె.

13 దేముడుచి కొణొతె రెగ్డయ్ లి రితి;

* “ప్రబుచి రచ్చన నజన్ తో ఎత్కి మాన్సు

† 10:6 10:6 6-7 ద్వితీయోపదేశ కాండుము 30:12-14చి కోడు పవులు ఇన్నె బెదయ్ తయ్. ‡ 10:10 10:10 నెంజెలె, మాన్సు జోవయించి పెట్టి నంపజా జోవయించి

చోడి ఒప్పనై, జోవయించి పాపుమ్ పుంచి జయెదె, జో రచ్చించుప జయెదె. § 10:11

10:11 యోవేలు 2:32, రోమియుల్ 9:33. * 10:13 10:13 యోవేలు 2:32.

తుచితెయి రచ్చన అస్సె మెన ఒప్పున
రచ్చించుప జయెదె”
మెన అస్సె.

సుబుమ్ కబుర్ సూనయ్తి వూచిచి రిసాచి కోడు

14 జలె, మాన్సుల్ క్రీస్తుక నంప నే జలె, జోవయించి రచ్చన కీసి
నజుల! జోచి రిసా నే సూన తిలె, జోక కీసి నంపజవుల! కో బోదన
కెరుక నే గెలె, కీసి జోచి రిసా సూనుల!

15 అన్నె దేముడు నే తెద్దయెలె, మాన్సుల్ కీసి జోచి బోదన కెరుల!
దేముడుచి కొణెతె రెగ్డయెలి రితి;

†“సుబుమ్ కబుర్ కో బోదన కెరుల గే,
జోవయించ చట్టొ కెద్ది సూటి!”

మెన అస్సె.

16 గని సూన్ల అమ్చ ఇస్రాయేలుల్ ఎత్కిజిన్ నంపజా అస్తి మెన
ఉచర నాయ్. యెసయాచి అత్తి దేముడు అన్నె రెగ్డయెలి రితి;

‡“ప్రబు, అమ్ సూనయ్లిసి కో నంపజా అస్తి?”

మెన రెగిడ్డి కోడు.

17 జలె, కొణె సూనయ్లెకయ్ మాన్సుల్ నంపజవుల. జేవ్ కిచ్చొ
సూనుక మెలె, క్రీస్తుచి రిసాచి సుబుమ్ కబుర్ సూనవ బోదన కెర్తిసి.

యూదుల్ ఒగ్గర్జిన్ సూనుక నెసిలిన్

18 జలె, అమ్చ యూదుల్క ‘సుబుమ్ కబుర్ సూన తతి నాయ్
గే?’ మెన ఆవ్ పుసితసి. సూనయ్ అస్తి. జా ఒండి లోకుమ్తె
సూనయ్ జలిన్చి రిసా దేముడుచి కొణెతె రెగ్డయెలి ఏక్ కోడు
బెదితయ్.

§“జోవయించి అవాడ్ ఒండి లోకుమ్తె సూనయి జా అస్సె,

ఎత్కి దిక్కుతె కెద్ది దూరి జలెకి,

జోవయించ కొణె సూనయ్ జా అస్తి”

మెన రెగ్డ అస్సె.

† 10:15 10:15 యెసయా 52:7. ‡ 10:16 10:16 యెసయా 53:1. § 10:18
10:18 కీర్తనలు 19:4.

19 జలె, ఆవ్ అన్నె పుసితసి; 'ఇస్రాయేలు ప్రెజల్ అర్దుమ్ కెరంతి నాయ్ గే?' మెన పుసితసి జలె, మోసేచి అత్తి దేముడు,

*"అంచ యూదుల్ నెంజిలసక తుమ్ యూదుల్ గోస జతి రితి కెరిందె,

బుద్ది నెంజిలి దేసిమ్చచి ఉప్పిరి తుమ్క కోపుమ్ జెతి రితి ఏక్ కామ్ జర్గు కెరిందె"

మెన యూదుల్ నెంజిలస నంపజలిన్చి రిసా యూదుల్ గోస జతిన్చి రిసా రెగిడ్డి కోడు.

20 వడ్డె, యూదుల్ నెంజిలస క్రిస్తుక నంపజా దేముడు తెన్ బెదితిన్చి రిసా అన్నె సొస్టుమ్చి కోడు దేముడు యెసయాచి అత్తి రెగ్గ అస్సె.

†"అంక చజుక నే ఉచర్లస, అంక చజ అస్తి.

అంచి రిసా నే పుసెలసక, ఆవ్ డీస అస్సి"

మెన రెగిడ్డి కోడు.

21 గని అమ్చ ఇస్రాయేలుల్చి రిసా జోచి అత్తి కిచ్చొ రెగ్గ అస్సె మెలె,

‡"కోడు నే సూన్త ఇస్టుమ్ అయ్లి రితి బుల్త ప్రెజల్క

ఒండి మెద్దెనె అత్తో చంపొ కెర బుకార్తె తిలయ్,

గని ఆవ్ దెతి వరుమ్ నెసిల"

మెన రెగ్గ అస్సె.

11

యూదుల్క దేముడు పూర్తి నే ములిలిన్

1 అప్పె కిచ్చొ పుసితసి? జోవయించ యూదుల్క దేముడు పూర్తి ముల అస్సె గే? నాయ్! ఆవ్ సొంత కి ఇస్రాయేలుడు, అబ్రాహామ్చి సెకుమ్తె జెర్మిలోసా, బెన్యామీను చి తెగతె జెర్మిలోసా.

2 జో దెతి రచ్చున తంక మెన జో అగ్గె తెంతో జాన్ల నిసాన మాన్సుల్క దేముడు ములె నాయ్. జా పొదిచ ఇస్రాయేలుల్చి

* 10:19 10:19 ద్విత్వీయోపదేశ కాండుము 32.21. † 10:20 10:20 యెసయా 65:1. ‡ 10:21 10:21 యెసయా 65:2.

రిసా కిచ్చొ మెన దేముడుచి మొక్కై ఏలీయా పూర్గుమ్చొ ఏడ తీర్పు సంగిలన్ గే దేముడుచి కొడతె అస్సె.

3* “ప్రబు, తుచ కబుర్లు సంగితనక మార అస్సి.

తుచి నావ్ తెన్ బందిల గుడివొ బొసుడవ అస్సి.

అప్పె ఆవ్ ఎక్కిలోయి తుచ కబుర్లు సంగితొసొ అస్సి,

చి అంక కి మారుక కోర్వ జతతి”

మెన ఏలీయా ఏడ్లన్.

4 గని దేముడు జోక

† “ ‘బయలు దేముడు’ మెలోసొక నే జొకరై అంకయ్ నిదానుమ్ తత్తు మెన నత్తు వెయిల్జిన్ యూదుల్ జా పాపుమ్తె నే సేడ్డి రితి పిట్టవ అస్సి”

మెన సంగిలన్.

5 అప్పె కి దేముడుచి దయక జో నిసాన సేంసిల యూదుల్ అస్సి.

6 గని జోవయించి రచ్చన కమ్మొవాట్ నాయ్, గని జోచి దయ వాటు జోవయింక దొర్కు జా అస్సె. కమ్మొవాట్ నాయ్, నెంజిలె దయ మెన సంగితిక, దయ జయె నాయ్.

7 జలె, కిచ్చొ రుజ్జు డిస్తయ్ మెలె, జేవ్ చజుక ఉచర్లిసి అమ్చ ఇస్రాయేలుల్క పిట్ట అస్సె. జోవయింతె కక్క దేముడు నిసాన్లన్ గే, జోవయింక దొర్కు జా అస్సె, గని తిలనక జోవయించి జీవ్ రాడ్ జా గెచ్చ, జా రచ్చన జేవ్ నజనుక నాయ్.

8 దేముడుచి కొడతె రెగ్డయ్లి రితి;

‡ “అప్పె ఎద కి ‘దెకుత్ నాయ్, సూన్తు నాయ్’ మెనయ్,

జేవ్ గుడ్డి బొయ్ రొ తతి రితి, జుమితన తతి రితి,

దేముడు జర్గు కెర అస్సె”

మెన రెగిడ్డి కోడు.

9 వడ్డె, దావీదు పూర్గుమ్చొచి అత్తి రెగిడ్డి రితి కి;

* 11:3 11:3 రానల్ మొబొల్ పుస్తకుమ్ 19:10, 14. † 11:4 11:4 రానల్ మొబొల్ పుస్తకుమ్ 19:18. ‡ 11:8 11:8 ద్వితీయోపదేశ కాండుము 29:4, యెనయా 29:10.

§“జోవయించి విందు అన్నిమ్ జోవయింక బోను జలి రితి జా,
జోవయింక దెర్ను సేడవ్ను, సిచ్చ ఆన్సు.

10 జేవ్ గుడ్డి జా దెకుత్ నాయ్, చి

జోవయించి పాటి కుబ్బి జలి రితి జా,

జోవయించి పాపుమ్చి జాడు కెయెక తెయెక వయుతు”
మెన రెగిడ్డి కోడు.

11 జలె, జేవ్ ఇస్రాయేలుల్ పిసిర్దిసి జలె, ‘పూర్తి సేడయ్ గెతు’
మెలి ఉద్దెసుమ్కయ్ దేముడు జర్గు కెర్లన్ గే? మెన ఆవ్ పుసితసి.
నాయ్! గని జేవ్ ఇస్రాయేలుల్ నంప నెంజి పొరపాట్ జతికయ్,
రచ్చన దొర్కు జతి వాటు యూదుల్ నెంజిలసక దొర్కు జా అస్సె. ‘జేవ్
యూదుల్ నెంజిలస రచ్చించుప జతిసి అమ్చ ఇస్రాయేలుల్ దెక గోస
జా బుద్ది ఉచరంతు’ మెనయ్ దేముడు దస్సి జర్గు కెర అస్సె.

12 జలె, జేవ్ ఇస్రాయేలుల్ పొరపాట్ జలిసి ఒండి లోకుమ్చక
దేముడు దెతి సొమ్సారుమ్ దొర్కు కెర అస్సె జలె, జేవ్ ఇస్రాయేలుల్
ఓడుప జలిసి యూదుల్ నెంజిలసక సొమ్సారుమ్ కెర అస్సె జలె,
జేవ్ యూదుల్ జల ఇస్రాయేలుల్ ఎత్కిజిన్ పడ్డొక రచ్చించుప జలె,
లోకుమ్క అన్నె కెద్ది సొమ్సారుమ్ జయెదె!

13 అప్పె, జలె, ఒత్త తిల తుమ్ యూదుల్ నెంజిలసక, జలె, ఆవ్
కిచ్చొ సంగితసి మెలె, తుమ్కయ్ సుబుమ్ కబుర్ నూనవుక మెన
ప్రబు అంక జోచొ బారికి కెర తెద్రవ అస్సె. ఈంజ కామ్చి రిసొ ఆవ్
ఒగ్గర్ నర్ల జతసి.

14 తూమ్ రచ్చించుప జతిసి అమ్చ యూదుల్ దెకిలె, ఇదిల్
జవున్ గోస జా, జోవయింతె సగుమ్జిన్ ప్రబుచి రిసొచి సుబుమ్
కబుర్క ఇస్టుమ్ జవుల, చి జో దొర్కు కెర్తి రచ్చన నజనుల. దస్సి జలె,
జేవ్ కి రచ్చించుప జతి కామ్తె ఆవ్ ఇదిల్ బెద తయిందె.

15 ఈంజ కిచ్చొక అంచి ఆస మెలె, దేముడు అమ్చ యూదుల్క
గడియ ములయ్లి రిసొ, ఒండి లోకుమ్చ అన్నె మాన్సుల్ కి

జోవయింతెన్ బెదుక వాటు అయ్లి. దస్సి కి దేముడు అమ్చ యూదుల్కయ్ అన్నె బెదవనై, మొర్ను తెంతో పిట్టవ జా జేవ్ కి నొవర్ జివుల.

రూక్తె కొమ్మల్ అంటుప కెర్తిన్

16 'నొవొ' మెన తొలితో బలి దిలి పాకుమ్ దేముడుక దిలి రిసొ సుద్ది జా అస్సె జలె, జా ఒండి పాకుమ్ సుద్ది జలి రితి జతయ్. అన్నె, రూక్చి చేరు సుద్ది జలె, కొమ్మల్ కి సుద్ది జవుల.

17 జలె, దేముడు నిసాన్ల ఇస్రాయేలుల్క 'ఒలీవ రూకు' మెనుమ. తుమ్ యూదుల్ నెంజిలనక 'వెర్రి ఒలీవ రూక్చ కొమ్మల్' మెనుమ. జలె, జో చెంగిలో ఒలీవ చెట్టెచ కొమ్మల్ సగుమ్ కండి జా సేడ అస్తి మెనుమ, అన్నె జా రూక్చ కొమ్మల్ గెలిన్తె తూమ్ యూదుల్ నెంజిల జా వెర్రి ఒలీవ రూక్చ కొమ్మల్ అంటుప జలదు, జో చెంగిలో రూక్చి చేరు దెతి సెక్తితె బెద తుమ్ చెంగిల్ జతి రిసాయి, జేవ్చి జివుక తుమ్ జతి రిసాయి.

18 దస్సికయ్, 'జో చెంగిలో రూక్చ కొమ్మల్ జలమ్ ఆము' మెన తుమ్ గవురుమ్ ఉచరన నాయ్. గవురుమ్ ఉచరనుక దెర్లె, తుమ్ కిచ్చొ ఉచార కెర మెలె, తుమ్చి సెక్తిక చేరు జియె నాయ్, గని చేరుచి సెక్తికయ్ తుమ్ జియె అస్సున్.

19 తూమ్ కిచ్చొ ఉచర్తె మెలె, "ఆము అంటుప జతి రిసాయి ఎజొమాని కొమ్మల్ సేడయ్లన్".

20 జా కోడు కి నిజుమ్, గని జేవ్ జోవయించి అన్మానుమ్చి రిసొ సేడయ్ జల. గని తుమ్ నముక్కుమ్ వాటు అంచుప జా టీవ్తెసి. జేవ్క ఉప్పిర్ తుమ్చి రిసొ తుమ్ గవురుమ్ ఉచరన నాయ్, గని దేముడుచి దయక తుమ్ బియె.

21 కిచ్చొక మెలె, జో రూక్చ సొంత కొమ్మల్ అన్మానుమ్ జలిన్క జో జోవయింక సిచ్చతె గలిలన్ మెలె, తూమ్ దస్సి అన్మానుమ్ జలె, తుమ్క కి కండ వెంట గెలెదె.

22 దేముడుచి దయచి రిసొ కి, జో దెతి సిచ్చచి సెక్తిచి రిసొ కి, తుమ్ చెంగిల్ ఉచర. పొరపాట్ జా సేడ్లనక జేవ్ విలువ జలి సిచ్చ

జో దెయెదె, గని జోచి దయచి తెడి తుమ్ తా నముకుమ్ వాట్ ఇండితె తిలె, జోవయించి దయ తుమ్చి ఉప్పిరి తయెదె. తుమ్ జా నముకుమ్ వాట్ నే ఇండిలె, తుమ్క కి కండ వెంట గెలెదె.

23 జేవ్ కి, జోవయించి అన్మానుమ్ ములిలె, జా రూక్తె అన్నె అంటుప జవుల. కిచ్చొక మెలె, జోవయింక అన్నె అంటుప కెర్తి సెక్తి దేముడుచి అత్తి అన్నె.

24 తుమ్ జలె, వెర్రి ఒలీవ రూక్చ కొమ్మల్ కండి జా తుమ్ మాములుమ్ నే బెదితో తోట ఒలీవ రూక్తె అంటుప జా అన్నున్ జలె, అన్నె సొంత జెర్మున్క తోట రూక్తె తా కండి జా తిల కొమ్మల్క జో ఒత్త అన్నె అంటుప కెరుక జయెదె!

25 తుమ్ సొంత గవురుమ్ నే ఉచరంతి రిసా, జో దేముడు బార్ కెర్లి ఈంజ గుట్టు సరిగా అర్దుమ్ కెరన, బావుడ్లు. కిచ్చొ మెలె, 'నంపజంక' మెన జో కెత్తిజిన్ యూదుల్ నెంజిలనక నిసాన్ల గే, జేవ్ ఎత్కిజిన్ ప్రబుతె జెతె ఎదక, ఏక్ వెల్లి వాట ఇస్రాయేలుల్ రాడ్ జీవ్ జా అస్తి.

26 గని యూదుల్ నెంజిలనతె కక్క కక్క జో నిసాన అన్నె గే, జేవ్ ఎత్కిజిన్ నంపజల మెలె, ఇస్రాయేలుల్ ఎత్కిజిన్ రచ్చించుప జవుల. దేముడుచి కొడెతె,

*“†సీయోనుతె రచ్చించుప కెర్తొసా జెర్తెదె.

‘యాకోబు’ మెన నావ్ తిల అమ్చ యూదుల్ తెంతొ పాపుమ్బుద్ది జో ఉదడెదె”
అన్నె,

27 †“జోవయించి పాపల్ ఆవ్ కెయెడ గెచ్చవ గెలిందె గే, తెదొడక అంచి ఈంజ నే పిట్టి ప్రమానుమ్ కోడు నెరవెర్చుప జయెదె” మెన రెగ్గ అన్నె.

28 తుమ్కయ్ ‘నంపజా రచ్చించుప జతు’ మెన, అప్పెచి మట్టుక సుబుమ్ కబుర్చి రిసా దేముడుక జేవ్ యూదుల్ విరోదుమ్ సుదల్

* 11:26 11:26 యెసయా 59:20, 21. † 11:26 11:26 ‘సీయోనుతె’ మెలె, యూదుల్తె, ఇస్రాయేలుల్తె. ‡ 11:27 11:27 యిర్మీయా 31:34, యెసయా 27:9.

జా అస్తి. గని జో జోవయింక నిసాన దెకిలె, జోవయించ పూర్గుల్క జో సంగిలి ప్రమానుమ్ కోడుచి రిసా, జో జోవయింక ప్రేమయ్ అస్సె.

29 కిచ్చొక మెలె, దేముడు దెతి వరుమ్, జో కక్క కక్క నిసాన బుకార్లినె, జో మార్పువ కెరె నాయ్. జో దసాచొ నెంజె.

30 తుమ్ అగ్గె దేముడుచ కొడె నే నూన్తె పాపుమ్ తెన్ తిలదు, గని జేవ్ యూదుల్ జోచి కోడు ములిలి రిసా, జో తుమ్చి ఉప్పిరి దయ తియ తుమ్చి పాపుమ్ వుంచ అస్సె.

31 దస్సి జేవ్ అప్పె జోచి కోడు నే నూన్తె పాపుమ్ తెన్ అస్తి. కిచ్చొక మెలె, తుమ్క జో దేముడు రచ్చించుప కెర్లె వాట్కయ్ జేవ్ కి రచ్చించుప జతి రిసాయి.

32 యూదుడు జలెకి, యూదుడు నెంజిలె కి, ఎత్కి మాన్సుక జోచి దయ దెకవుక మెనయ్, ఎత్కిజిన్ ఎక్కి రితి జోచి కోడు నే నూన్తి పాపుమ్తె దెర్ను సేడుక మెనయ్ జో సెలవ్ దా అస్సె.

దేముడుచి గవురుమ్

33 దేముడుచి దయచి సామ్సారుమ్, జోచి బుద్ది, జోచి గ్యానుమ్ కెద్ది తమ్మనచి! జోచ తీర్పుల్ కెద్ది తెల్వచ! కెద్ది తెలివి మెలె, అమ్ మాన్సుల్ కోయి అర్దుమ్ కెరనుక నెత్తుమ్, మెనుక నెత్తుమ్! జోచ కమొ అమ్ కోయి పరిచ్చ కెరుక నెత్తుమ్!

34 దేముడుచి కొడెతె,

“ప్రబుచి పెట్టి తిలిసి కో కెయ్ జాన అస్తి?

జోక కో బుద్ది సంగుక జయెదె? కోయి నాయ్”

మెన అన్సె,

35 * “జో రునుమ్ జతి రితి కో కెయ్ జోక కిచ్చొ దా అస్తి?

కోయి నాయ్, కెయ్ నాయ్, కిచ్చొయ్ నాయ్”

మెన రెగ్గ అస్సె.

36 కిచ్చొక మెలె, ఎత్కి జోతె తెంతో జెతయ్, జో జెర్మయ్లో. ఎత్కి జోచి తెడి అస్సె, చి జోచి గవురుమ్ దెకయ్తి రిసాయి అస్సె. కెయ్త తెయ్త జోవయింక జొబర! ఆమేన్.

12

ప్రబుచి ఆత్మసెక్తిక జియ

1 దేముడు దెతి రచ్చన జోచి దయకయ్ తుమ్క దొర్కు జలి రిసా, బావుడ్లు, ఆవ్ బతిమాల్పా జా తుమ్క కిచ్చొ సంగితసి మెలె, జేవ్ జోచయ్ తతి రితి, దేముడుక సర్ల కెర్తి రితి, జోక తుమ్చ ఆగ్ జీవ్ తిలి బలి దిలి రితి తుమ్ బుద్ది ఇండ. ఈంజ సేవ తుమ్క సరి జలిసి.

2 'ఎత్కిజిన్ ఇస దస కమె కెర్తతి, అమ్ కి కెరుమ' మెలి రితి ఈంజ కాలుమ్చ కమె రితి తుమ్ ఇండ నాయ్. తుమ్చి ఆత్మతె నొవ మాన్సుల్ జా, చి ప్రబుచి ఇస్టుమ్ కిచ్చొ కిచ్చొ గే పూర్తి అజ్జ జస్తె. జోచి ఇస్టుమ్ కిచ్చొ మెలె, చెంగిల్ తిలిసి ఎత్కి, జోక సర్ల కెర్తిసి ఎత్కి, కిచ్చొ పొరపాట్ నెంజిలిన్ ఎత్కి మెన పూర్తి తుమ్ అజ్జ జస్తె.

3 మెలె, దేముడు అంక దిలి దయ తెన్ తుమ్క ఆవ్ కిచ్చొ బతిమాల్పా జా సంగితసి మెలె, తుమ్ కో గవురుమ్ ఉచరన నాయ్, గని తుమ్ ఎత్కి మాన్సు జాగర్త తెన్ సరిగా పరిచ్చ కెరన, నముకుమ్చి రిసా దేముడు కక్క కిచ్చొ సెక్తివరుమ్ దా అస్సె గే, తుమ్చితె ఎత్కి మాన్సు చినన, తుమ్క దిలి సెక్తి వాడిక కెర.

4 మెలె, ఎక్కి ఆగ్తె ఒగ్గర్ వాటల్ తవుల, అన్నె ఎత్కి వాటల్క ఎక్కి రితి కామ్ తయె నాయ్, గని ఏక్ వాటక ఏక్ కామ్, అన్నెక్ వాటక అన్నెక్ కామ్ తయెదె.

5 దస్సి, అమ్ ఒగ్గర్జిన్ జలెకి, క్రిస్తుచి తెడి ఎక్కి ఆగ్ జా అస్సుమ్, చి ఎక్కిలోక ఎక్కిలో అమ్ తోడు తంక అమ్చి పూచి,

6 జాకయ్, అమ్చితె కక్క ప్రబు కిచ్చొ సెక్తివరుమ్ దా అస్సె గే, అమ్ ఎత్కి మాన్సు బుద్ది తెన్ జా సెక్తి వాడిక కెరుక. ప్రబుచ కబుర్లు సంగితి సెక్తి తిలొసా జలె, ప్రబు దిలి నముకుమ్ తెన్ సంగున్.

7 ప్రబు దిలి కిచ్చొ సేవ కెర్తొసా జలె, జా సేవ కెర్చు. ప్రబుచి బోదన కెర్తి సెక్తి తతోసా జలె, బోదన కెరుక.

8 ప్రబు దిలి సెక్తిక మాన్సుల్క జాగర్తల్ సంగితొ దిట్టుమ్ దయిరిమ్ కెర్తొసా జలె, జాగర్తల్ సంగుక, దయిరిమ్ సంగుక. మాన్సుల్క తోడు దెంక సెక్తి తిలోసా జలె, దర్ముమ్ తెన్ దెవుసు. సంగుమ్క ఏలుప కెర్తి సెక్తి తిలోసా జలె, జోవయించి జా కామ్ నిదానుమ్ దెకన్సు. బాదల్ సేడ కన్కారుమ్ జలసక దెకితి సెక్తి తిలోసా జలె, సర్దబుద్ది తెన్ దెకున్.

సర్దబుద్ది ప్రేమబుద్ది తెన్ తా

9 ఎక్కి మెన్సు మాయ నెంతె మాన్సుల్క తుమ్ ప్రేమ దెకితె తా. గర్చి ఎత్తి దూరి కెర, చెంగిల్ తిలిసి దెరన.

10 బాబేన్క దెకితి సత్తిమ్ తెన్ ఎక్కిలోక ఎక్కిలో ప్రేమ దెకితె తా. దాకు కెరన ఎక్కిలోక ఎక్కిలో వెల్లో మెలి రితి దెక.

11 కెయఁక బద్దుకుమ్ జా నాయ్, గని దేముడుచి సుద్ది తిలి ఆత్మ, తుమ్చి ఆత్మతె దీవు లగిల్ రిత తా, కెడ్డోడ్ కి ప్రబుచి సేవ కెర్తినతె తుమ్చి ఆత్మ పూర్తి బెదవ.

12 పరలోకుమ్తె తుమ్ బెదితి రచ్చన కచితుమ్ నెరవెర్చుప జంక తిలిన్చి దయిరిమ్క సర్దసంతోసుమ్ తా, బాదల్ ఓర్చుప జా, ప్రార్దన కెర్తె తా,

13 అన్నె నంపజలసక కొత్తుల్ తిలె, తుమ్క తిలిన్క తోడు దాస, చి అన్నె మాన్సుల్క గెరి బుకారా మరియాద దెక.

14 “జోక చెంగిల్ దెకు” మెన, తుమ్క అల్లర్ కెర్తనచి రిసా ప్రబుక తుమ్ ప్రార్దన కెర. “జోక ప్రబు సిచ్చ కెర్చు” మెన తుమ్ ఉచర నాయ్. జా పొన, గని ‘జోక చెంగిల్ దెకున్’ మెనయ్ తుమ్ కోరప జా.

15 అన్నె, సర్ద తెన్ తిలన తెన్ సంతోసుమ్ జా, ఏడ్డన తెన్ ఏడ్డి రితి తోడు తా.

16 ఎక్కిలో తెన్ ఎక్కిలో ఎక్కి మెన్సు తెన్ జియ. * గవురుమ్ జతినక ఆస నే జతె, బడాయ్ నెంజిలీన్తె బెద, కిచ్చొ గవురుమ్ ఉచరన నాయ్. తుమ్క తుమీ బుద్ది తిలన మెన ఉచర నాయ్.

17 కో తుమ్క కిచ్చొ నస్టుమ్ కెర తిలె, జోక తుమ్ కిచ్చొ నస్టుమ్ అన్నె కెర నాయ్. † గని కో తుమ్క నింద కెరుక నెతిరి రితి, ఎత్తిజిన్ చినితి రితి సత్తిమ్ ఇండ.

18 ఎత్తిజిన్ తెన్ సేంతుమ్ తెన్ తంక ఆస జా. దస్సి, ఎక్కి మెన్సు తెన్ తతిసి తుమ్ పిట్టవ నాయ్. జేవ్ పిట్టయ్లె, జోవయించి పూచి, గని తూమ్ పిట్టవ నాయ్.

19 ప్రేమ తిల బావుడ్లు, మాన్సుల్ తుమ్క అల్లర్ కెర్లె, జోవయింకయ్ తుమ్ అల్లర్ కెర నాయ్. పోన, దేముడు సిచ్చ కెర్లె, కెర్లు, గని తుమి తుక్లె తా. దేముడుచి కొడెతె,

‡“సిచ్చ కెర్లి సెక్తి అంచి. ఏ జేవ్ అల్లర్ కెర్లనక ఆవ్వీ
సిచ్చ కెరిందె మెన ప్రబు సంగితయ్”
మెన రెగ్గ అస్సె.

20 §“తుమ్చొ విరోదుమ్ సుదొక చూ తిలె, జోక అన్నిమ్ దాస.

జోక తాన్ తిలె, పితిసి దాస.

తుమ్ దస్సి కెర్లదు మెలె,

జోచి బోడి ఆగి సువ దిలి రితి జయెదె, చి

జో పూర్తి లాజ్ జా తప్పు చినంతిసి జోవయింక నొప్పి దెయెదె.”

మెన దేముడుచి కొడెతె రెగ్గ అస్సె.

21 అన్నెక్లొ తుమ్క కెర్లి గార్ తుమ్క జిన్తి రితి తుమ్ కోపుమ్ జా నాయ్, గని జో కెర్లి గార్ ఓడుప జా ప్రేమయ్ జిన్తి రితి, తుమ్చ విరోదుమ్ సుదల్క తుమ్ ప్రేమయ్ దెక.

* 12:16 12:16 సామెతల్ 3:7. † 12:17 12:17 సామెతల్ 3:4. ‡ 12:19
12:19 ద్విత్వీయోపదేశ కాండుము 32:35 § 12:20 12:20 సామెతల్ 25:21, 22.

13

అధికారులక బియ్యం కెర ఇండ

1 దేసిమక ఏలుప కెర్ర అధికారులక ఎత్తి మాన్సు బితు. కిచ్చొక మెలె, దేముడు సెలవ్ దెతో నాయ్ జలె, అధికారుల్ జా తత్త నాయ్, అన్నె, తిల అధికారుల్ ఏలుప కెరుక జో దేముడుచి ఇస్టుమ్.

2 జాకయ్, అధికారుల్చి కోడుక కో విరోదుమ్ కెర్రతి గే, దేముడు దిలిన్చి ఉప్పిరి విరోదుమ్ కెర్రతి, అన్నె, కో జోచి సెలవ్చి ఉప్పిరి విరోదుమ్ కెర్రతి గే, జోవయింక జోయ్యి జెతి సిచ్చ కవుల.

3 అన్నెయ్ కిచ్చొక అధికారులక మరియాద దెకుక మెలె, చెంగిల్ బుద్ది ఇండితనక నాయ్, గని గర్బ కమె కెర్రనకయ్ సిచ్చ కెరుల. అధికారి జలొ కేన్ మాన్సుక 'సిచ్చ కెరెదె' మెలె బయిమ్ నెంతె జింక ఇస్టుమ్ జతసు జలె, సత్తిమ్ కెర, చి తుమ్క చెంగిల్ దెకెదె.

4 తుమ్క 'చెంగిల్ తత్తు' మెనయ్ దేముడు జోవయింక జా సేవ దా అన్నె. గని తుమ్ నేరిమ్లు కెరె జలె, తుమ్ బియ్యం. కిచ్చొక మెలె, సిచ్చ కెరుక జోక అధికారుమ్ అన్నె. 'నేరిమ్ కో కెరుల గే, సిచ్చ కెర్పు' మెనయ్ దేముడు జోవయించి అధికారుమ్ జోవయింక దా అన్నె.

5 జాకయ్, సిచ్చ నే సేడ్డి రిసా కి, గని అన్నెయ్ 'దేముడుచి మొక్కె అమ్ అధికారులక దస్సి దెకుక మెనయ్, అమ్చి పెట్టి సేంతుమ్ తంక జలె, దస్సి కెరుక అన్నె' మెనయ్ కి, అధికారుల్చి కోడు అమ్ బింక అన్నె.

6 ఇన్నెచి రిసా కి సిస్తు గట్ట దెతసు. కిచ్చొక మెలె, సిస్తు నజిత సుంకర్లు చి అన్నె అధికారుల్ ఏలుప కెర తుమ్క దెకుక మెన, జోవయించి కామ్ దేముడు జోవయింక దా అన్నె.

7 జేవ్ ఎత్తిజిన్క దెతిసి జోవయింక దాన. సిస్తు నజుక అధికారుమ్ తిలనక సిస్తుచి డబ్బుల్ దాన, ప్రబుతుమ్క దెతిసి ప్రబుతుమ్క దాన. గవురుమ్క విలువ తిలనక గవురుమ్ దెక, చి మరియాదక విలువ తిలనక మరియాద దెక. దస్సి ఎత్తిజిన్క జేవ్చి జేవ్చి మరియాద కెరుక.

ఎక్కిలోక ఎక్కిలో ప్రేమ కెరై తతిసి

8 ప్రేమ కెరుకయ్, గని వేర రునుమ్ కత్తెయ్ జా నాయ్. కిచ్చొక మెలె, అన్నె మాన్సుల్క కో ప్రేమ ఇండితయ్ గే, ఆగ్గుల్ ఎత్కితె దొర్కు జలిసి నెరవెర్కుప కెర్తయ్.

9* ‘లంజెకమె కెర నాయ్’ మెలిన్ జలెకు, ‘నరు అత్య కెర నాయ్’ మెలిన్ జలెకు, ‘చోర నాయ్’ మెలిన్ జలెకు, ‘అన్నె మాన్సుల్చి ఆస్తిక ఆన జా నాయ్’ మెలిసి జలెకు, దేముడుచ ఆగ్గుల్ ఎత్కితె తిలిసి కి ఎక్కి ఒడుగుతె బెదితయ్. కేన్ ఒడుగుతె మెలె,

†“తుక తూయి కెద్ది ప్రేమ కెరంతసి గే,

తుచి పాసిచొ మాన్సుక తెద్ది ప్రేమ తుయి కెరుక”

మెన దేముడుచ కొడొతె రెగ్గవ అస్సె.

10 అమ్చి పెట్టి ప్రేమ తిలె, పాసిచొ మాన్సుక కిచ్చొ అల్లర్ కెరుక నెనుమ్. జాకయ్, ప్రేమతెయి ఆగ్గుల్ ఎత్కి నెరవెర్కుప జతయ్.

ప్రబు అన్నె ఉత్త జెతి వెల్లి దీసి పాసి జెతయ్

11 అన్నె, ప్రబు సంగిలి సమయుమ్ పాసి జా అస్సె మెన జాన్సు. మెలె, అగ్గె నిజ తిలె కి, అప్పె ఉట్ట తెలివి జా తంకయ్ అస్సె. సమయుమ్ జా గెచ్చ అస్సె. అమ్ తొలితొ నంపజలి కంట, అమ్చి రచ్చన పాసి జా అస్సె.

12 రాత్ పాయితి రితి, ఉజిడ్ జయెదె. జాకయ్ అందర్బుద్దిచ కమె వెంట గెల కెర, ఉజిడ్ బుద్దిచ అయ్దల్ గలనుమ.

13 మెద్దెనెచి ఉజిడ్తె బెదిత కమెతె ఇండుమ. మెలె, ‘సర్ద కెర్తసుమ్’ మెన వెట్కారుమ్ జతిసి, మచ్చితిసి పొన. లంజెకమె, ఆగ్చి ఆన ముద్దొ నే కెరంతిసి పొన. కొడొ జుజవ జట్టి జతిసి, గోసల్ కెర్రిసి, పొన.

* 13:9 13:9 నిర్గమకాండుమ్ 20:13-15, 17. ద్విత్వీయాపదేశ కాండుము 5:17-19, 21. † 13:9 13:9 లేవీయకాండుమ్ 19:18.

14 గని ప్రబు జలో యేసుక్రీస్తుచి బుద్ది గలన, మాన్సుచి ఆఁగవ తుమ్చ ఆసల్ నెరవెర్పువ నే కెరంతి రితి జాగర్త తా, దనచక కిచ్చొ వాటు దాస నాయ్.

14

ఇసి కెర్లె గారు దస్సి కెర్లె చెంగిలి

1 నంపజలన కీసి ఇండుక గే ఇదిల్ నేన్లో కేన్ నంపజలనక బెదవన, గని ముక్కిమ్ నెంజిలిన్చి రిసా జోవయింతెన్ కామ్క నెంజిల కొడో జుజవుక పోన.

2 ఏక్చి రిసా ఉచరుమ. “కిచ్చొ కి కంక జయెదె” మెన, దయిరిమ్ తిలోసా ఉచరెదె, గని “ఈంజ జా గారు” మెంతి అలవాట్ తెంతో పూర్తి విడ్డల్ నే జలోసా కో జలెకు ముక్కల్ గట్ట కయె నాయ్.

3 జలె, తుమ్చితె నే కతోసాక, కతోసా నిస్కారుమ్ దెకున్ నాయ్, చి కతోసాక, నే కతోసా నిస్కారుమ్ దెకున్ నాయ్. కిచ్చొక మెలె, దేముడు ఇన్నెక కి జోవయింక కి బెదవన అస్సె.

4 అన్నెక్లోచా సేవ కెర్టాన్చి రిసా తుమ్చితె కో తీర్పు కెరుక కొన్న? జోవయింక ‘చెంగిల్’ మెనుక గే ‘గార్’ మెనుక గే కచి సెక్తి మెలె, జోచో సాంత ఎజొమానిచి సెక్తి, అన్నె కచి నాయ్. జో నిజుమి నంపజలోన్ జలె, కో వేర ఉచర్లె కి, జో టీవెదె. కిచ్చొక మెలె, జోక టీవెడుక ప్రబుక సెక్తి అస్సె.

5 పడ్డొ, ఏక్ దీసిచి కంట అన్నెక్ దీసిక ‘ఎల్లకాలుమ్చి రిసా ముక్కిమ్చి’ మెన ఎక్కిలో ఉచరెదె, గని అన్నెక్లో జలె, ఎత్కి దినాల్క ఎక్కి రితి దెకితయ్. ఎత్కి మాన్సు ఈంజేవ్ దొన్నితె కేన్ రగుమ్ ఉచర్తసు గే, సరిగా ఉచర తా. ఎత్కి మెన్సు నిదానుమ్ ఇండ.

6 దీసిక, “ప్రబుచి గవురుమ్ దెకయ్తి రిసా ఈంజ జా కామ్ పలాన దీసి కెర్లె చెంగిల్” మెన కో ఉచర్తయ్ గే, ప్రబుచి గవురుమ్ ఉచర్తయ్. దస్సి, ‘తుయి దిలిసి’ మెన దేముడుక ఉచరయ్ కో ముక్కల్ కతయ్ గే, ప్రబుక గవురుమ్ దెతయ్. దస్సి కి, ముక్కల్ నే కతోసా కో జలె, జో

కతిన్ క 'తుయి దిలిసి' మెన దేముడుక ఉచర్లె, జో కి ప్రబుక గవురుమ్ దెతయ్.

7 అమ్చి రిసా అమ్మి జిము నాయ్, మొరుమ్ నాయ్.

8 అమ్ జిలె, ప్రబుచి సేవచి రిసాయి జితసుమ్. అమ్ మొర్లె, జా కి జోచి సేవ. జాకయ్, అమ్ జిలె కి మొర్లె కి, జోచయ్ మాన్సుల్ అమ్. జోయ్యి అమ్చో ఎజోమాని.

9 ఇసికయ్ క్రిస్తు మొర్లన్ చి అన్నె జిలన్. మెలె, మొర్లుక జిన కెర, మొర్లసక కి, జితసక కి జో ప్రబు జా, ఎజోమాని జా, ఏలుప కెరుకయ్.

10 తుమ్క బావుడ్లు జల అన్నె నంపజలన్ చి రిసా తుమ్ కిచ్చొక అల్లర్చ తీర్పుల్ ఉచర్లను, నిస్కారుమ్ ఉచర్లను? లోకుమ్చక జో పరిచ్చు కెర్తి వెల్లి దీసిక అమ్ ఎత్కిజిన్ ప్రబుచి మొక్కె టీవ, జోచి అత్తి తీర్పు జమ్దె.

11 దేముడుచి కొడతె,
"అవ్ కచితుమ్ జివ్వి అస్సి. దస్సి, కచితుమ్,
అంచి చట్టె ఎత్కి మాన్సు మొగ్రల్ టెక సెర్ను సేడుల, చి
'తుయి దేముడు. తీర్పు కెరుక తుచి అత్తి అస్సె'
మెన ఎత్కి చోండి ఒప్పునుల మెన ప్రబు సంగితయ్"
మెన రెగ్గవ అస్సె.

12 జలె, ఈంజ లోకుమ్తె అమ్ ఇండిలి బుద్దిచి రిసా దేముడు సొంతచి మొక్కె తెదొడక అమ్ ఎత్కి మాన్సు సాచి నజనుక తయెదె.

13 జాకయ్, అప్పె తెంతో ఎక్కిలోచి ఉప్పిరి ఎక్కిలో తీర్పుల్ కెరుమ నాయ్, గని కేన్ బావో ఆత్మక నే పిసిర్తి రితి, కేన్ పొరపాట్ నే జతి రితి, జో ఆత్మక డిట్టుమ్ జతిసి నే పిట్టి రితి, ఎక్కి మెన్సు తెన్ ఇండుక అమ్చి పెట్టి ఒప్పునుమ.

14 ప్రబుచి తెడి తా కిచ్చొ జాని, కిచ్చొ పూర్తి దయిరిమ్ తెన్ అస్సి మెలె, జేవ్చి సొంత సెక్తి కిచ్చొ వస్తువచి రిసా 'గారో' మెనుక నెంజె. గని జాక 'గారో' మెన కో దెకితయ్ గే, జోకయ్ జా గారు జయెదె.

15 జాకయ్, తుమ్ కేన్ జవున్ రగుమ్ కతిసి అన్నెక్లొచి ఆత్మతె జోవయింక అల్లర్ కెరెదె మెన తుమ్ జాన జానయ్ కయ్లె, తుమ్ ప్రేమయ్ ఇండుక ముల తస్తె. తుమ్ కేన్ జవున్ రగుమ్ కయ్లె ప్రబు మొర రచ్చించుప కెర్లొ అన్నెక్లొచి ఆత్మతె జోక పాడ్ కెరెదె జలె, జా కంక పొన.

16 జాకయ్, 'చెంగిల్' మెన కేన్ అలవాట్చి రిసా తుమ్ జాన్సు జలెకి, వేర మాన్సుల్చి మొక్కె జా కామ్చి రిసా ప్రబుచి నావ్ నిస్కారుమ్ జయెదె జలె, జా నే కయ్లె చెంగిలి.

17 కిచ్చొక మెలె, దేముడుచి రాజిమ్తె బెదితిన్క కతిసి పితిసి ముక్కిమ్ నాయ్, గని దేముడుచి సుద్ది తిలి ఆత్మ దెతి సత్తిమ్ సేతుమ్ అన్నె సంతోసుమ్, జేవ్ ముక్కిమ్.

18 ఈంజేవ్ వరుమ్ ఇండితి రితి కో క్రిస్తుచి సేవ కెరుల గే, 'చెంగిల్' మెన దేముడు కి మాన్సుల్ కి దెకుల.

19 జాకయ్, ఎక్కి మెన్సు తెన్ తతిన్చి రిసా, ప్రబుచి ఉప్పిర్చి అన్నె మాన్సుల్చి నముకుమ్ డిట్టుమ్ కెర్రిన్చి రిసా కిచ్చొ కిచ్చొ కామ్క జెయెదె గే, జయ్యి ముక్కిమ్ ఉచర్తె తమ.

20 ఎక్కి కతిసి నే కతిన్చి రిసా మాన్సుచి పెట్టి దేముడు కెర్రి కామ్ తుమ్ పాడ్ కెర నాయ్. నిజుమి ఎత్కిక కి 'కంక జయెదె' మెనుక జయెదె, సుద్ది అస్సె, గని ఆమ్ కతిన్చి రిసా, అన్నెక్లొ జోచి ఆత్మతె తప్పు జలి రితి జయెదె జలె, అమ్చి తప్పు.

21 తుమ్ ముక్కల్ కతిసి జవున్, కేన్ రగుమ్ పితిసి జవున్, కిచ్చొ కామ్ కెర్రిసి జవున్, తుమ్చొ బావొ జతో కేన్ నంపజలనచి ఆత్మతె జోవయింక పాడ్ కెరెదె జలె, జా కామ్ తుమ్ ములిలె చెంగిలి.

22 జలె, 'ఇసి దస్సి కెర్రి చెంగిల్' మెన తుమ్చి పెట్టి కిచ్చొ నముకుమ్ అస్సున్ గే, తుమ్చి పెట్టి దేముడుకయ్ ఒప్పున. 'ఆవ్ కయ్లె తప్పు నెంజె' మెన కక్క దయిరిమ్ తయెదె చి 'ఆవ్ కయ్లె కచి ఆత్మతె జోవయింక పాడ్ కెరె నాయ్' మెన జో జాన్లె, జో మాన్సుక చెంగిలి.

23 గని 'కయ్లె తప్పు' మెన కో ఉచరయ్ కయ్లె, ప్రబుచి సిచ్చ అనన్తయ్. కిచ్చొక మెలె, జో కయ్లిసి జోచి పెట్టి జో ఉచర్లిన్ తెన్, జోవయించి నముకుమ్ తెన్, బెదె నాయ్. 'పలాన కామ్ కెర్లె చెంగిల్' మెలి దయిరిమ్ అమ్చి పెట్టి నెంజిలె, జా కామ్ అమ్ కెర్లె పాపుమ్ జతసుమ్.

15

దేముడుచి గవురుమ్ దెకవుక

1 అమ్ ఆత్మక డిట్టుమ్ తిలస జలె, డిట్టుమ్ నెంజిలసచి జాడు వయిలి రితి జోవయించ అన్మానల్ ఓర్నుప జా అమ్చి ఇస్టుమ్ గడియ ములిలె చెంగిలి.

2 అన్నె మాన్సుల్క 'ఆత్మక డిట్టుమ్ జా చెంగిల్ జతు' మెన, జోవయించి ఇస్టుమ్ తిలిన్క మరియాద్ దెకుమ.

3 కిచ్చొక మెలె, క్రీస్తు ఎక్కి జోచి సొంతయ్ ఇస్టుమ్క కిచ్చొ కెరె నాయ్, గని దేముడుచి కొడొతె రెగిడ్లిసి జొయ్యి సంగిలి

*"దేముడు ఓ బ,
తుక మాన్సుల్ కెర్లె నిందల్ అంకయ్ లయ అస్తి"
మెన జో సంగిల్ రితి అస్సె.

4 జలె, హుర్గుమ్ రెగిడ్లిసి కిచ్చొక రెగ్డ అస్సె మెలె, అమ్కయ్ 'సిక్కుత్' మెనయ్ రెగ్డ అస్సె. దస్సి, దేముడుచి కొడొతె రెగ్డయ్లిసి అమ్క నిదానుమ్ దయిరిమ్ సికడ్లె, అమ్ దయిరిమ్ డిట్టుమ్ జమ్దె.

5 యేసుయి జో ఇండిలిన్క తుమ్క వాట్ దెకయ్లి రితి తుమ్ ఎక్కిలో తెన్ ఎక్కిలో దస్సి ఎక్కి మెన్సు తెన్ జితి రితి, నిదానుమ్ దెతో దయిరిమ్ దేముడు తుమ్క సెక్తి దెవుసు,

6 చి తుమ్ ఎక్కి మెన్సు తెన్ ఎక్కి అవాడ్ రితి జా, అమ్చొ ప్రబు జలొ యేసుక్రీస్తుచొ అబ్బొన్ జలొ దేముడుచి గవురుమ్ దెకయ్తె తస్సె.

7 జాకయ్, క్రీస్తు తుమ్కయ్ బెదవన్లి సర్ల తెన్, దేముడుచి గవురుమ్ దెకయ్తి రిసా తామ్ కి ఎక్కిలోక ఎక్కిలో బెదవన.

* 15:3 15:3 కీర్తనలు 69:9.

8 కిచ్చొక మెలె, తుమ్క ఆవ్ కిచ్చొ మెంతసి మెలె, క్రీస్తు
†యూదుల్క సేవ కెర్తొసా రితో జలో. కిచ్చొక మెలె, దేముడుచి సత్తిమ్
దెకవుక. కీసి మెలె, జోవయించ పూర్గుల్క దేముడు దిల ప్రమానల్
నెరవెర్చుప కెర్తి రిసా.

9 అన్నె కిచ్చొచి రిసా మెలె, యూదుల్ నెంజిలసక కి జో దెతి రచ్చున
జో దొర్కు కెర్లె, జోవయించి దయ కన్నారుమ్చి రిసా జేవ్ కి దేముడుక
గవురుమ్ దెతు మెనయ్. దేముడుచి కొడొతె దావీదు పూర్గుమ్చొ;

‡“జేవ్ కి, యూదుల్ నెంజిలస తెన్ కి సర్ద జా,
గాయ గాయ తుచి నావ్ గవురుమ్ కెరుమ్దే”
మెన రెగ్గ అస్సె.

10 పడ్డొ దేముడుచి కొడొతె,

§“జోవయించ సొంత మాన్సుల్ తెన్ తూమ్ కి, యూదుల్ నెంజిలస,
సర్దసంతోసుమ్ జా”

మెన మోసేచి అత్తి రెగ్గ అస్సె.

11 పడ్డొ దావీదుచి అత్తి అన్నె రెగిడ్డిసి,

*“యూదుల్ నెంజిల ఎత్తి దేసిమ్చ,
ఒండి లోకుమ్చ మాన్సుల్,
ప్రబుచి గవురుమ్ గాయ”
మెన రెగ్గ అస్సె.

12 పడ్డొ అన్నె, యెసయాచి అత్తి దేముడుచి కొడొతె,

†“యెస్సయిచి సెకుమ్తె ఎక్కిలో జెర్రెదె.

జొయ్యి ఉట్ట, యూదుల్ నెంజిలసక ఏలువ కెరెదె, చి
జోచి ఉప్పిరి నముకుమ్ తియ, జేవ్ యూదుల్ నెంజిలస
రచ్చునచి దయిరిమ్ తెన్ తవుల”
మెన రెగిడ్డి కోడు.

† 15:8 15:8 ఈంజ ఉత్తమ్ తొలితో రెగిడ్డ కాగ్గల్తె కిచ్చొ అస్సె మెలె, ‘యూదుల్ జతి
గుర్తుచి సున్నతి కెరన్లసక సేవ కెర్తొసా...’ ‡ 15:9 15:9 సమూయేలు దొన్నిచి పుస్తకుమ్

22:50, కీర్తనలు 18:49. § 15:10 15:10 ద్వితీయోపదేశ కాండుము 32:43.

* 15:11 15:11 కీర్తనలు 117:1. † 15:12 15:12 యెసయా 11:10.

13 జలె, రచ్చన జతి దయిరిమ్ దెతో దేముడు సొంత తుమ్చి పెట్టి జోచి నముకుమ్చి సర్ల సేంతుమ్ దెవుసు, చి దేముడుచి సుద్ది తిలి ఆత్మచి సెక్తి తుమ్చి ఆత్మతె తా, తుమ్చి ఆత్మ పూర్తి డిట్టుమ్ దయిరిమ్ జా గెచ్చెదె.

యూదుల్ నెంజిలసతె పవులు ప్రబుచి కామ్ కెర్లిసి

14 ఆవ్, బావుడ్లు, తుమ్చి రిసా కిచ్చొ దయిరిమ్ తెన్ అస్సి మెలె, తుమ్చి పెట్టి ప్రబుచి సత్తిమ్ అస్సె. జో దెతి గ్యానుమ్ అస్సె, చి ఎక్కిలోక ఎక్కిలో బుద్ది సంగుక తుమ్క సెక్తి అస్సె. జా ఎత్తిచి రిసా అంక దయిరిమ్.

15 గని, సగుమ్ కమొచి రిసా తుమ్క ఇదిల్ గట్టిజ సంగిల్ రితి రెగ్గ అస్సి, తుమ్క పప్పుత్ నాయ్ మెన. దేముడు అంక దిలి అదికారుమ్ వరుమ్చి రిసా ఆవ్ జా రెగుడుక జయెదె.

16 జో దిలి అదికారుమ్ వరుమ్ మెలె, యేసుక్రీస్తుచి రిసాచి జోచి సుబుమ్ కబుర్ నూనవ నూనవ, జో దేముడుచి సేవ కెర్లొ పూజరి మెలి రితో ఆవ్ జంక మెన జో నిసాన కామ్ తియార్లి వరుమ్. మెలె, యూదుల్ నెంజిలసక క్రీస్తుక నంపజా దేముడుచి సుద్ది తిలి ఆత్మచి సెక్తిక జేవ్ జోచయ్ జా, సుద్ది జా దేముడుక సరి జలి బలి జతి రితి, జోచి అత్తి ఆవ్ సార్ప కెర దెంక.

17 జలె, దేముడుచి సేవ ఆవ్ కెర్లిన్చి రిసా 'చెంగిల్చి' మెన క్రీస్తు జలొ యేసుచి తెడి అంక దయిరిమ్.

18 మెలె, యూదుల్ నెంజిలస జోవయించి ఉప్పిర్చి నముకుమ్ ఇండితి రితి క్రీస్తుయి అంచి అత్తి జర్గు కెర్లిన్చి రిసాయి ఆవ్ సంగితసి. జో ప్రబు కిసి ఈంజ కామ్ అంచి అత్తి జర్గు కెర్లన్ మెలె, ఆవ్ బోదన కెర్లిన్తె, ఆవ్ ఇండిలి బుద్దితె,

19 జో అంచి అత్తి కెర్ల జోచి గుర్తుచ వెల్లొ కమొతె, జో దిలి దేముడుచి సుద్ది తిలి ఆత్మచి సెక్తికయ్ జర్గు కెర్లన్. దస్సి, జోచి సెక్తికయ్, యెరూసలేమ్ పట్టుమ్ తెంతో తుమ్క సముద్రుమ్

ఒత్తలేతోచి ఇల్లూరికు ప్రదేసిమ్చి ఎదిలి దూరిక క్రీస్తుచి సుబుమ్ కబుర్ జా ఎత్కితె ఆవ్ సూనవ అస్సి.

20 దస్సి, అంచి ఆస కిచ్చొ మెలె, వేర మాన్సు పునాది కెర్రి ఉప్పిరి బందుక నెస, క్రీస్తుక మాన్సుల్ నంపజా తిలిన్తె నాయ్, గని వేరతెయ్, మాన్సుల్ జోక నేన్లిన్తెయ్ సుబుమ్ కబుర్ సూనవుక అంచి ఆస.

21 దేముడుచి కొడొతె;

‡“జోచి రిసా కో అగె నే సూనయ్లన సూన, జేవ్ గుడ్డి మెలి రితి జలిసి గెచ్చ, దెకుల. జోచి రిసా కెయ్చ నే సూన్లన అర్దుమ్ కెరనుల” మెన రెగ్గయ్లి కోడు.

రోమ్ పట్టుమ్చ గెచ్చుక మెన పవులు ఉచర్రిసి

22 జలె, సుబుమ్ కబుర్ నే సూన్ల టాన్లుతె గెచ్చ సూనవుక అంచి కామ్ తిలి రిసా, అప్పెక తుమ్తె జెంక అంక వాటు తయె నాయ్.

23 గని అప్పె, ఈంజేవ్ ప్రాంతుమ్లుతె అంక అన్నె కామ్ నాయ్ మెన, ఒగ్గర్ వెర్పుల్ తెంతొ తుమ్తె జెంక అంచి ఆసచి రిసా,

24 స్పెయిను దేసిమి ఆవ్ గెతి పొదిక, వట్టె తుమ్తె గోత్ జా తుమ్క దెకుక ఉచర్రిసి. సర్ల తెన్ గడియ తుమ్చి తెన్ తా పుండిలయ్ మెలె, తుమి అంక బార్ కెర వట్టె తెద్రయ్తె.

25 గని అప్పె యెరూసలేమ్తె ఉట్ట గెతసి; ఒత్తచ నంపజలన్క తోడు న దెంక.

26 మాసిదోనియచ చి అకయచ నంపజలన్క యెరూసలేమ్చ యూదుల్చ బీద జల నంపజలన్క తోడు ఉక్కుల తెద్రవుక ఇస్టుమ్ జల.

27 ఈంజేవ్ ఇస్టుమ్ జల, గని అన్నె జేవ్ యెరూసలేమ్చ నంపజలన్తె రునుమ్ జలి రితి జా అస్తి. మెలె, యూదుల్కయ్ దేముడు దిల ఆత్మవరల్తె ఈంజేవ్ యూదుల్ నెంజిలనక వాట అయ్లి రిసా రునుమ్ జలి రితి జా అస్తి, చి జేవ్ యూదుల్క కిచ్చొ

జవున్ ఈంజ లోకుమ్తె కామ్క జెతికయ్ తోడు ఈంజేవ్ యూదుల్ నెంజిలస దిలె, చెంగిలి.

28 జాకయ్, ఈంజేవ్ ఉక్కిలి తోడు నా దెతి కామ్ కుట్టయ్లయ్ మెలె, స్పాయిన్తె గెతి వట్టె తుమ్తె జెయిందె,

29 చి తుమ్తె పావ అయ్లె, క్రిస్తు దెతి ఆత్మసెక్తి అంచి పెట్టి బెర తా జా సెక్తి తెన్ని జెయిందె మెన జాని.

రోమియుల్ పవులుచి రిసా ప్రార్దన కెరుక

30 బావుడ్లు, 'అమ్చొ ప్రబు జలొ యేసుక్రిస్తుచి నావ్ తెన్ చి దేముడుచి సుద్ది తిలి ఆత్మచి ప్రేమక, అంచి రిసా దేముడుక తుమ్ ప్రార్దన కెర కెర అంక తోడు తా' మెన తుమ్క ఆవ్ బతిమాల్పా జా సంగితసి.

31 కిచ్చొచి రిసా మెలె, ఆవ్ అప్పె గెతి యూదయ ప్రదేసిమ్చ యేసుచి రిసా అన్మానుమ్ తిలసతె ఆవ్ దెర్ను నే సేడ్డి రిసా, పడ్డొ ఒత్తచి యెరూసలేమ్ పట్టుమ్చ నంపజలసచి రిసాచి అంచి సేవ జోవయింక చెంగిల్ సేడ్పు మెనయ్ తుమ్ ప్రార్దన కెర.

32 దస్సి జెయిమ్ జలి మెలె, సర్దనంతోసుమ్ తెన్ ఆవ్ తుమ్తె జెంక జయెదె, చి తుమ్చి తెన్ తా సర్ద తెన్ పుండుక జయెదె.

33 సేతుమ్ దెతో దేముడు సొంత తుమ్చి తెన్ తవున్! ఆమేన్.

16

సర్ద తెన్ సంగుమ్తె బెదవనుక

1 క్రిస్తుచి తెడి అమ్క అప్పు జలి పీబే, కెంక్రేయ పట్టుమ్చి సంగుమ్తె వెల్లొ తేర్బోద జా ప్రబుచి సేవ కెర్తయ్. జాక 'సత్తిమ్చి' మెన ఆవ్ సాచి జతసి.

2 తుమ్తె జా అయ్లె, ప్రబుచయ్ జల మాన్సుల్క దెకితి మరియాద తెన్ జాక బెదవన, చి కిచ్చొ కామ్తె జేవ్ కి తోడు కావలె మెలె, తోడు తా. కిచ్చొక మెలె, అగ్గె తెంతొ ఒగ్గర్జిన్ నంపజలసక జా తోడు కెర అస్సె, అంక కి.

3 యేసుక్రీస్తుచి కామ్ అంచి తెన్ బెద కెర్ల ప్రిస్కిల్లక చి అకులక అంచి ప్రేమ సంగ.

4 అంక 'మొర్ను నాయ్' మెన జా సుట్టు జెవ్వి ప్రమాదుమ్ జల. ఎక్కి ఆవ్ మెన నాయ్, గని యూదుల్ నెంజిల బావుడ్లుచ సంగుమ్లు ఎత్కి జేవ్ దొగులచి కామ్చి రిసా అంచి తెన్ జోవయించి నర్ల కి సంగితసుమ్.

5 జోచి గెరి సబ కెర్లి సంగుమ్చ ఎత్కిజిన్క అంచి ప్రేమ సంగ. ప్రేమ తిలో ఎపైనెటుక అంచి ప్రేమ సంగ. ఒండి ఆసియా ప్రదేశిమ్తె జొయ్యి తొలితొ ప్రబుక నంపజా మార్పుప జలో.

6 తుమ్చితె నిదానుమ్ కామ్ కెర్లి మరియక కి సంగ,

7 పడ్డొ అంచ బందుగుల్ జత అంద్రోనిక చి యూనియక కి. అంచి తెన్ జేవ్ జేలి జా తిల. ప్రబుచి నుబుమ్ కబుర్ సంగిత బారికుల్తె జోవయింక గవురుమ్ దెకితతి, చి అంచి కంట అగ్గెయి క్రీస్తుచ మాన్సుల్ జల.

8 పడ్డొ, ప్రబుచి తెడి ఆవ్ ప్రేమ తిలో అంప్లియతునక అంచి ప్రేమ సంగ.

9 పడ్డొ క్రీస్తుచి కామ్తె అమ్చి తెన్ బెదిలో ఊర్బానుక, చి ప్రేమ తిలో స్థాకునక అంచి ప్రేమ సంగ.

10 క్రీస్తుక సత్తిమ్ తిలో అపెల్లెక చి అరిస్టాబూలుచి కుటుంబుమ్చ ఎత్కిజిన్క సంగ.

11 అన్నె, అంక బందుగుడు జతో హెరోదియోసుక చి నార్కిస్సు చి కుటుంబుమ్తె ప్రబుక నంపజలసక సంగ.

12 పడ్డొ, ప్రబుచి కామ్ కెర్ల త్రుపైనా చి త్రుపోసా మెల తేర్బోదల్క జోబర సంగ. పడ్డొ ప్రబుచి కామ్ నిదానుమ్ కెర్లొ ప్రేమ తిలో పెర్నిసుక జోబర సంగ.

13 పడ్డొ ప్రబుచి తెడి ఒగ్గర్ బుద్ధి సుదో జలో రూపుక చి అంక అయ్య మెలి రితి జలి జోచి అయ్యన్క అంచి ముద్దుచి జోబర సంగ.

14 పడ్డొ అసుంక్రితుక, ఫ్లెగోసుక, హెర్మోకుక, పత్రోబక, హెర్మాకుక చి జోవయింతెన్ తిల బావుడ్లు ఎత్కిక అంచి ప్రేమ జోబర సంగ.

15 పడ్డో పిలోలోగుక, యూలియాక, నేరియక, జోవయించి బేనిక, ఒలుంపాకుక, చి జోవయింతెన్ తిల బావుడ్లు ఎత్తిజిన్క అంచి ప్రేమ సంగ.

16 ఎక్కిలోక ఎక్కిలో తుమ్చి ప్రేమ దెకయ్తి రితి ప్రబుచి నావ్ తెన్ ఎక్కిలోక ఎక్కిలో సుద్ది తిలి ముద్దు తెన్ జొకర. ప్రబుచ సంగుమ్లు ఎత్తి తుమ్క జోవయించి ప్రేమ సంగ తెద్రయ్తతి.

17 జలె, బావుడ్లు, తుమ్క కిచ్చో బతిమాల్పు జా సంగితసి మెలె, తుమ్క సికడ్లి బోదన నాయ్, గని వేరచి సికడ జట్లు కెర్త అన్మానల్ కెర్తన కొన్నగె చిన కెర, జోవయింక తుమ్ సూన నాయ్. దూరి కెర.

18 దన మాన్సుల్ అమ్చో ప్రబు జలొ క్రీస్తుక నాయ్, గని జోవయించ సొంత ఆసల్కయ్ సేవ కెర్తతి, అన్నె, తేలిక లట్టబ మాన్సుల్క పులవ, ఒగ్గర్ తెలివి నెంజిల మాన్సుల్క మోసిమ్ కెర్తతి.

19 ప్రబుచి కోడు తుమ్ సొంత నిదానుమ్ కెర్తిసి ఎత్తిజిన్ జాన్తి, చి తుమ్చి రిసొ అంక సర్ద, గని తుమ్క 'చెంగిల్చితె తెలివి తత్తు, గని గర్చి నేన్తు' మెనయ్, తుమ్చి రిసొ అంక ఆస.

20 దస్సి జలదు మెలె, తుమ్చ చట్టో నయ్తాన్క నుఁద బీడవ జిన్తి రితి, సేతుమ్ దెతో దేముడు జినఎదె. అమ్చో ప్రబు జలొ యేసుక్రీస్తుచి దయ తుమ్చి తెన్ తవున్!

21 అంచి తెన్ ప్రబుచి కామ్ కెర్తొ తిమోతి తుమ్క జోచి ప్రేమ సంగ తెద్రయ్తయ్. దస్సి కి లూకియ, యాసోను చి సోసిపత్తు, అంచ బందుగులు.

22 పవులు సంగితి ఈంజ ఉత్తమ్ రెగిడ్డొ తెర్తియు మెలొ ఆవ్ ప్రబుచి తెడి అంచి ప్రేమ సంగ తెద్రయ్తసి.

23 ఆవ్ ఈంజ ఉత్తమ్ సంగ రెగ్డయ్తో పవులుక టాన్ దిలొ, ఒండి సంగుమ్క టాన్ దెతో గాయియు తుమ్క జోవయించి ప్రేమ సంగ తెద్రయ్తయ్. దస్సి కి ఈంజ పట్టుమ్చ కమొచి డబ్బుల్ దెకితో ఎరస్తును, చి అమ్చో బావొ జలొ క్వర్తును జోవయించి ప్రేమ సంగ తెద్రయ్తయ్.

24 * అమ్చో ప్రబు జలో యేసుక్రీస్తుచి దయ తుమ్ ఎత్కిజిన్ తెన్ తవున్! ఆమేన్.

25 జలె, 'నూనవు' మెన అంక దిలి సుబుమ్ కబుర్ వాటు యేసుక్రీస్తుచి రిసా బోదన కెర్తి వాటు తుమ్క డిట్టుమ్ కెర్తో దేముడుక జోఒర! జా సుబుమ్ కబుర్తె బెదితి గుట్టు జో అప్పె బార్ కెర అస్సె. మదెనె, అగ్గె తెంతో లుంకడ తిలో.

26 జలె, యూదుల్ నెంజిలసక కి జోవయించి రచ్చన దొర్కు జలి రిసాచి, ఈంజ గుట్టు జో అప్పె బార్ కెర అస్సె, చి జోవయించ కబుర్లు పూర్ణమ్ సంగిలన రెగిడ్లిసి నూనయ్ జతిస్తె ఒండి లోకుమ్తె ఎత్కి దేసిమ్చక జాన్సున్ మెన కెయక తెయక తా గెతో దేముడుచి ఆడ్ర, ఒండి లోకుమ్తె మాన్సుల్ నంపజా జోచి కోడ్ రితి ఇండుత్ మెనయ్.

27 జలె, యేసుక్రీస్తుచి అత్తి జర్గు జలి కామ్చి రిసా ఎత్కి గ్యానుమ్ తిలో ఎక్కిలో దేముడుక కెయక తెయక జోఒర!

* **16:24 16:24** ఈంజ ఉత్తమ్ రెగిడ్ల తొలితొచ పుస్తకుమ్ సగుమ్తె 24నంబర్చి కోడు తయె నాయ్.

Kupia

Kupia: Kupia New Testament (New Testament)

copyright © 2018 Wycliffe Bible Translators, Inc.

Language: Kupia

Contributor: SIL International (in Asia)

All rights reserved.

2025-05-06

PDF generated using Haiola and XeLaTeX on 6 May 2025 from source files
dated 6 May 2025

7ccb2690-4432-5e86-88c1-f8ee976f30f4